

رُحَى حَيَاة



- ٣ مخنووووووق ! ♥
- ١٤ لحظة؟! و لآ.. حياة؟؟! ♥
- ٢٤ أكيد فيه سر!!! ♥
- ٥٦ نفسي ألاقها ♥
- ٧١ بتفكر في إيه؟! ♥
- ٧٧ مرتاح كده؟؟! ♥

- جمع وترتيب -

د / مصطفى إبراهيم زايد

رقم الإيداع: ٢٠١٨/٢٧١٣٥

الترقيم الدولي:

ISBN ٩٧٨-٩٧٧-٨٥٤٦٥-٧-٦



386

دار الشباب

للنشر والتوزيع

٠١١٢٠٠٠٤٦٤٦

٠١١٢٦٥٠٠٦٩٦

dar.alshabab@yahoo.com

مخنووووق !!

❖ مين فينا مش نفسه يعيش سعيد ؟؟؟

◀ مين فينا مش بيدور على السعادة ؟؟؟

◀ هل عمرك شوفت إنسان مش بيدور على السعادة ؟

- لأ طبعاً .. كل الناس في كل مكان في العالم بتدور على

السعادة ، ونفسها وأمنية حياتها إنها تعيش سعيدة ..

◀ لو قربنا شوية من الناس ، وسألنا كل واحد عن كل

حاجة بيعملها في حياته ، هتلاقيه بيعمل الحاجة دي سواء

كانت صح أو غلط ؛ ظناً منه إنه هيلقي فيها سعادته ..

❖ تعالوا يا شباب نبحث عن السعادة مع بعض ..

👍 تعالوا نشوف السعادة الحقيقية فين بالضبط ؟

وإزاي نوصل لها ، علشان نعيش أحلى حياة ..

❖ وقبل ما ندخل في الموضوع ، هنضرب مثال بسيط :

◀◀ دلوقتي فيه واحد سمع إن فيه جهاز جديد إسمه

"كمبيوتر" ، وكل الناس بتشتريه ، وكل الناس فرحانه به ،

والكل بيقول إنه تكنولوجيا وتقدم ومفيد جداً.... إلخ ..

فاشترى أحدث جهاز ، شاشة وكيبورد وماوس وكل حاجة ..



« وبعد ما صاحبنا روح البيت .. عايز بقى يشغل الجهاز اللي هو دافع فيه دم قلبه ، فجمع العيال وأم العيال ، وحط الجهاز في الفيشة ، وعمل الآتي :

« مسك السماعات وحطها عند ودانه ، ومسك الماوس وحطه عند فمّه ، وجاب الكيبورد وطلب رقم تليفون جوز خالته ، علشان يتصل بهم ، ويعمل صلة رحم ..

ولكن..... كل ما يطلب الرقم على الكيبورد مفيش فايده!

😊 والعيال عمّالين يضحكوا .. والواد الصغير يقول له :

مش يمكن يا بابا الحرارة لسه ماجتش ١١٩

والثاني يقول: يمكن ما دفعناش الفاتورة ١١٩

والثالث يقول: مش يمكن جوز خالتي ماعندوش كمبيوتر؟

المدام قالت له: مش يمكن يا أبو العيال الجهاز ده مش

بتاع اتّصال أصلاً .. ١٩٩

قال لها: إزاي بس يا أم العيال؟ ، ده كل الناس بتشكر

فيه! معقول مايكونش فيه إمكانية إني أتصل بحد ١١٩٩٩

« قالت له: بس.. وجدتها ، أنا عرفت خلاص الجهاز ده

بتاع إيه؛ وراحت دخلت المطبخ بسرعة، ورجعت وفي إيديها

حلّة فيها ميه ، وقالت له وسع كده! ، وقلبت الكيسا على

جنبها ، وفتحت المسامير ، وراحت حطت الحلّة جوه الكيسا

، وداست علي زرار الـ CD على أساس إن الجهاز يشتغل ..

ولا سخنت ولا حتى بردت! ، اركني إنتي على جنب بقي!

وبعدین بقى؟؟ هو الجهاز ده فيه عفريت ولا إيه!!

قال: مفيش قدأمي غير إني أسأل أي حد من أصحابي ..

بجد و حلو أوي .. دیکور جدید و عامل شغل جامد !

= قال له : هو ده إستخدامه ؟! - قال : أنا بستخدامه كده !!

تتحط قدام باب الشقة وترحم الدنيا ..

= قال له : هو ده استخدامہ ۱۹ - قال : انا بستخدمہ كده ۱۱۱

أذكى واحد في أصحابي ، وطول عمره بتاع مفهومية ..

☎ اتصل به وقال له: بص يا صاحبي ، أنا مخنوق جداً !



أنا اشتريت جهاز كمبيوتر جديد ودفعت فيه دم قلبي ،
ومن ساعتها وأنا مش عارف أستخدمه خالص !

► حسام قال له : يا عم ماتزعلش نفسك.. أنا جبت الجهاز
ده وفرحان به ، وعرفت كل حاجة بتشتغل فيه إزاي ..
أنا يا سيدي شوفت سماعات ، فقلت أكيد بتطلع صوت ؛
فشغلت عليها فلاشة وصوتها زي الفل ! ، وبالنسبة للشاشة
ياسيدي؛ أنا وصلتها على الدش وشغلتها تليفزيون!!
والباور شغلّت به كذا ، والماوس عملت به كذا ،،، إلخ

« صاحبنا ما اقتنعش ! ، ولكنه آخر ما زهق؛ عمل زي حسام ،
بس برده لسه حاسس إن الجهاز له فوايد أكثر وأهم من كده ..!»

« وفي لحظة من اللحظات ، وصاحبنا قاعد في بيته ،
لقى تحت السجادة كتيب صغير؛ اللي هو (كتالوج الجهاز) ،
واللي كتبه الراجل اللي صنع الجهاز، ووضح فيه إمكانيات
الجهاز وطريقة إستخدامه وتركيبه وفكّه وتحديثه.. إلخ ..

« وقعد صاحبنا طول الليل ماشي ورا تعليمات الكتالوج
؛ لحد ما بدأ في استخدام الجهاز صح ، وعرف إنه
بالجهاز ده يقدر يعرف الصين حصل فيها إيه دلوقتي ،
ويقدر يجيب نتيجة ابنه في الثانوية العامة ، ويقدر يبحث
عن كل شيء ، ويشوف العالم كله بضغطة بسيطة..

✍ **إنتهى المثال الطويل ..**



❖ أنت بقي كبرت دماغك ، ورحت عملت زي صاحبنا بتاع الكمبيوتر ، وسألت فلان وفلان لعلك تلاقي عندهم حل !

✘ **سأنت فلان .. فقال لك:** يا ابني الدنيا دي مافيهاش
غير البنات .. متّع نفسك وعيش يومين مع بنت جميلة
تدّلعك .. ومش هتلاقي أحلى من البنات في الدنيا دي ..
إنت رحت مشيت مع فلانة ، وسهرت مع علّانة وقضيتها ..
ولكن ... في الآخر بتراجع برده لسه مخنوق ..!! ☹☹

[X] فسألت صاحبك الثاني .. وقلت له: أنا مخنوق جداً ومش عارف أعمل إيه ؟! ما عندكش حاجة تجيب من الآخر ١٩٩
-**قال لك:** سيبك إنت ، مفيش غير قاعدة عربي في شقة الواد ماندو ، بيجيب (حتتين حشيش) خلاصة !! ، بنقعد نعمل دماغ عالية متكلفة ، ماتحسش بالدنيا دي خاااالص!
رحت جرّبت وقعدت معاهم ، وكنت سعيد ونسيت الدنيا لفترة ، ولكن بعدها رجعت أتعس مما كنت 😞😞😞 !!



✕ وهي كانت قاعدة مع حبيبها فلان ، ومُستمتعة وهو ماسك إيديها ، وحاسه إنها هتطير من الفرحة وهي معاه.. ولكن بعد فترة بقى بينهم فتور ، وزهق منها وسابها ، وقعدت شهور مخنوقة ومكتئبة وقلبها مضطرب من الألم !!

ليبيبيبيبي كده ؟؟؟؟؟؟؟!!!!

◀ **ليه كل ما تمشي في طريق وتظن إنه فيه السعادة ، يطلع في الآخر نكد وحزن وخنقة ..!!**

❁ يا حبيب قلبي .. هي شوية معادلات هنجسبها مع بعض :

كل السعادة اللي جرّبتها واللي اتكلّمت عنها ،

ما هي إلا ➤ **"سعادة مؤقتة"** أو **"سعادة جزئية"**

◀ يعني قلبك كان بيرفرف وقت ما كنتي ماشية مع فلان؛ دي (سعادة وقتية) .. مدة زمنية محدّدة وانتهت.

◀ لما شربت حشيش ومخدّرات ودماغك طارت؛ دي (سعادة جزئية) ، يعني عملت متعة لجزء معين منك.

◀ اللي بيزني أو بيتفرج على أفلام إباحية بيمتّع نفسه (متعة وقتية وجزئية) .. شهوة وقت محدّد لجزء معين

من الجسم وخلصت .. **لكن القلب فين بقى من كل ده ؟!**

► **هتقول : طيب إزاي نوصل للسعادة الكاملة الدائمة للقلب ؟؟**

- **هقول لك :** شوف حديث النبي ﷺ : **[ما من قلب إلا بين**

إصبعين من أصابع الرحمن ، إن شاء أقامه ، وإن شاء أزاعه] صحيح

➡ يعني إنت عمال تدور على السعادة هنا وهناك ..

وعمال تسأل فلان وعلان ، وتقعد فلان وعلان ..

➡ وإنتي يا أختي عماله تقلدي فلانة علشان فاكراها

سعيدة ، وتغيري من فلانة وفاكراها سعيدة ..

وفي الآخر برده الكل تايه ومخنوق ومش لاقى سعادة بجد !

وده لأننا نسينا إن سعادة القلوب بيد المولى القدير ﷻ !

♥ **السعادة الكاملة الدائمة للقلب بتكون من الله ﷻ** ♥

كما قال الله تعالى : ﴿ وَأَنَّهُ هُوَ أَضْحَكَ وَأَبْكَى ﴾ النجم: ٤٣

الله ﷻ هو وحده فقط اللي يقدر يخليك سعيد أو حزين ..

💞 يقدر يعافيك من الأمراض ؛ فهتكون سعيد ..

💞 يقدر ينجحك ويوفقك في شغلك ؛ وتكون سعيد ..

💞 يقدر يرزقك أولاد وذرية صالحة ؛ وتكون سعيد ..

💞 يقدر يستر ذنبك ويرقق قلبك ؛ وهتكون سعيد ..

💞 يقدر يبعد عنك الشرور والفتن ؛ وتكون سعيد ..



🌸 **ربك ﷻ يقدر يخلي حياتك كلها فرح وسعادة** 🌸

[illegible]



« القهقهة وإن واحد يموت من الضحك لمأ يسمع نكتة شيء ، وإن الواحد قلبه يكون فرحان (بجد) شيء ثاني !
 ❖ سيبيكم من المظاهر .. المهم القلب حالته إيه ؟؟!!

« طيب .. ليه أنا ذكرت لك المثال الطويل بتاع الكمبيوتر في الأول ؟؟

« علشان أوصل لك إن محدش مهما كان علمه وخبرته وتجاربه ، هيقدر يفهم في الكمبيوتر قد اللي صنع الكمبيوتر ؛ هو الوحيد اللي عارف كل جزئية فيه ، وإيه ينفعه وإيه يضره ، وإيه يخلّيه سريع وإيه يهّنجه .. وهكذا..

« فأى حاجة عايز تستخدمها ؛ لازم ترجع للصانع ، علشان تقدر تستفيد الإستفادة القصوى من الشيء ده ..
وأي محاولات غير كده؛ هتبقى مجرد تضييع وقت ومجهود !

« وبالتالي؛ لما تكون عايز سعادة لقلبك ➡ تدبر كلام ربنا ؛
لأن ربنا ﷻ هو اللي خلقك وخلق قلبك ، وهو الوحيد اللي يعلم ما يسعد هذا القلب ويفرحه ، وما يغمه ويحزنه !
 ربنا ﷻ وحده هو الأعلم باللي يخلّي القلب يحيا حياة السعادة والفرح، واللي يخلّيه يحيا حياة الضنك والبؤس!

❖ **واحد هيقول : بس أنا مش بشتكي من قلبي إطلاقاً!!**
أنا معايا فلوس وعندي إمكانيات معيشاني أحسن عيشة!!
يعني مش محتاج حد يدلني على طريق الوصول للسعادة!

هقول لك: حتى ولو كنت سعيد؛ فالسعادة اللي إنت حاسس بها دي ماتجيش أي حاجة جنب السعادة الحقيقية..!

➡ زي اللي يجيب جهاز كمبيوتر جامد جداً ، حاجة يعني كده زي بروسيسور 7 أ وشاشة "56 8K وسماعات Super Stereo .. إمكانيات عالية جداً ، ولكن مع كل ده، تلاقيه مركب رامات 500 ميجا بس !!!

➡ **إيبيبيه ده؟؟؟؟ معقووول؟؟!!**

➡ بالرغم من إن الجهاز إمكانياته تحفة ؛ لكن الرامات قليلة جداً جداً !!! ، آه فعلاً هتستمع بالشاشة الكبيرة والسماعات الروعة والكيسا الجميلة ؛ لكن الجهاز هيهنّج معاك طول الوقت! ، صحيح هتكون مستمتع؛ لكن إنت مستمتع يادوب بـ ١٠٪ من المتعة اللي المفروض تحسّ بها!

يعني إنت ممكن تكون مستمتع وسعيد وفرحان بحياتك ،

➡ **بس للأسف؛ إنت مضحوك عليك !!!**

إنت لسه ماحسيتنش إطلاقاً بالسعادة الحقيقية بجد !



﴿ الجسد يا حبيب قلبي له حدود في المتعة ، وعلشان كده؛ مش كل اللي إنت عايزه وبتحلم به هتقدر توصل له! يعني مش هتقدر تطير في السما بجسمك !!
إنما القلب ملهوش حدود ! ، إنت تقدر تطير بقلبك وتطلع لسابع سما ، تقدر تسجد بقلبك تحت عرش الله!

تقدر توصل بقلبك لمقامات في السعادة ملهاش نهاية ولا حد !

♥ سعادة القلوب ؛ إنك تمشي في الدنيا وإنت مش شايلى همّ أي حاجة .. إنك تحسّ بأمان وراحة وطمأنينة ..
 تحسّ بمعنى وجودك في الحياة ، ويبقى عندك دائماً الشغف والأمل والطموح إنك تكمل في طريقك ..
 معاني جميلة القلب بيعيشها ، تتحسّ وما تتحكّش أبداً ..
 لأن مفيش أي كلام ولا أي وصف في أي لغة من لغات العالم كله يقدر يعبر عنها ! ، **ف ركز على : (قلبك)**
ودور عن السعادة الحقيقية جواه ..

وبما إن السعادة من عند الله ﷻ ..

وبما إننا اتفقنا إنك محتاج السعادة علشان قلبك ، يبقى لازم تعرف وتتيقّن زي ما النبي ﷺ قال:

(إنّ ما عند الله لا يُنال إلا بطاعته)

عايزها لحظة؟؟!! ولا .. حياة؟؟!!

لو خَيْرْنَا أي إنسان عاقل على وجه الكرة الأرضية كلها ، ما بين إنه يعيش سعيد ويتمتع لمدة لحظة أو لحظات أو يوم أو حتى سنة ، وما بين إنه يعيش حياته كلها سعيد ومستمتع ؟؟ ، فأكد وبدون أدنى شك وأدنى تفكير هيختار إنه يعيش حياته كلها؛ مش مجرد لحظة أو مدة معينة ..

ولكن على أرض الواقع ، بننصدم لما نلاقي كتير جداً من الناس اللي المفروض إنهم عاقلين، سواء كانوا مسلمين أو غير ذلك ، بيختاروا متعة اللحظة على متعة الحياة !!

الكثير اqفتنوا شهوات الدنيا لدرجة إنهم أصبح كل همهم وشغلهم الشاغل ، إنهم بيبحثوا عن لحظة يتمكنوا فيها من تحقيق الشهوات دي بأي طريقة! ، لدرجة إنهم ممكن يضيعوا سنين من عمرهم؛ بل أعمارهم كلها ، ويدفعوا كل ما يملكون ، علشان يوصلوا إلى تلك اللحظة المنشودة !

⌚ **قد تكون اللحظة اللي بيدوروا عليها ، لحظة لذة بطعام !**

محصورة في مليمترات في المساحة من اللسان لحد آخر الفم ، لينتهي عند النقطة دي بالضبط الإحساس بلذة ومتعة الأكل مهما كان روعة شكله ولذاذة طعمه !



⌚ وقد تكون اللحظة دي ، في مشهد من فيلم إباحي قذر !

ممکن الشاب يقعد على النت ٢٤ ساعة يدور في ١٠٠٠ موقع إباحي علشان يقدر يوصل لمقاطع تشبع شهوته وتروي عطشه ، ولكن زي اللي بيشرّب ميه مالحه ، بيزيد عطش على عطشه، ويوصل لمرحلة إنه مابقتش حاجة بتأثر فيه ولا توصله لنشوته ، لحد ما يتبلّد عنده الإحساس !

⌚ وقد تكون اللحظة دي ، في لقاء عهر وفجور !

لو أي حد قلبه لسّه حيّ ، هيلقي بعدها ألم وقرف واشمئزاز ، واحساس بالخيانة ، وتلطخ الضمير ، وسفالة المقصد !!

أما اللي قلبه مات ، فبيتمادي في البحث عن الجديد والمزيد ، قد يكون المزيد ده بحثاً عن اللحظة في شذوذ ، أو فيما هو أشدّ انحطاطاً ودونية وأبشع !

⌚ وقد تكون اللحظة دي ، في رقص مجنون في حفلة صاخبة !

لحد ما يترنح الجسد من كتر التعب ودي قمة اللذة عنده!

⌚ والبعض بيدور على اللحظة دي ، في نشوة في خمر أو مخدر !

بيهرب فيها من كل الهموم ، ولكن مجرد ما بيخلص مفعولها ويفوق ، بيرجع تاني لمرارة اللي هرب منه،



وساعتها يبقى كل أمله إنه يأخذ جرعة ثانية تنسيه ،
وتفضل لذّة اللحظة تقل مع التكرار ، فيزود الجرعة ،
وتقل الاستجابة ؛ لحد ما ينهار الجسم وتُستنفذ قوّته !!
أو زي ما يحصل في الغالب ، بانتهاء تلك اللحظة
بجرائم قتل أو انتحار أو موت بجرعة زيادة !!!

🕒 وقد تكون اللحظة في ضحك هستيري على تضاهاة وقبائح ،
أو باستهزاء وسخرية من الخلق ، أو أي سَفَه من هذا القبيل !

وكل ده لما يشبع دواخل تلك النفوس مهما عملت !!



وبالشكل ده .. يستمر هؤلاء في البحث عن
"اللحظة" ، وبرغم كل التعب والمشقة والتكلفة
والعقبات اللي بيقابلوها؛ إلا إنهم للأسف
الشديد بيستمروا ، ومش بيضفوا من غفلتهم !

◀ فليبحثوا عن اللحظة ، وابحث أنت عن الحياة

أما المؤمن؛ فيبحث عن الحياة نفسها ، علشان يلاقي
نفسه في كل لحظة بيعيشها ، فيعيش جمال وكمال
كل لحظة ، ويخرج منها بأروع ما فيها ..



✓ يعيش كل يوم وكل لحظة في الحياة الرائعة دي وهو
بيتنقل من متعة ولذّة ، للذّة ثانية أروع وأحلى وأجمل ..



❦ **يا شباب ..** الأمثلة والنماذج التي ذكرناها ، ممكن يكون كل واحد فينا شايفهم حواليه في كل وقت وهما عمالين يدوروا على أي لحظة شهوة، أو ممكن يكون هو نفسه واحد من النماذج دي؛ واحد للأسف بيختزل الحياة في لحظة !! لكن إحنا عايزين نعيش الحياة كلها، نعيش كل لحظة فيها؛

مش نفسك تعيشها صح بقى؟! تعيش الحياة الحقيقية؟!

لأن "الحياة" ⇨ بمعناها "الواسع" بيشترك فيها البشر مع الحيوانات وباقي المخلوقات .. حياة مفيش فيها أي تمييز بينهم .. بياكلوا ويشربوا ويتحركوا ويتناسلوا... إلخ ..

❧ **ولكن الحياة بمعناها الحقيقي ، معناها الرّاقى ، معناها الخاص ، هي : حياة (المؤمنين)**



♥ **المؤمنين** اللي اتصلوا بخالقهم سبحانه وتعالى ، فأشرقت قلوبهم بنور الإيمان ، وعقولهم بنور معرفة الله تعالى واليقين به .. وهي دي الحياة التي يتخلّى في الوجود وجود آخر من النور والأخلاق الرفيعة والمعاني السامية ...

✓ **هي دي الحياة التي أراد الله ﷻ لنا أن نحياها** بإرساله الأنبياء والرسل ، وعلى رأسهم حبيبنا محمد ﷺ ، اللي علّم الدنيا كلها من خلال حياته الشريفة إزاي تكون "الحياة الحقيقية" التي بها يرتقي الإنسان لتكريم الله له ، واللي بها يختلف ويرتقي عن البهائم والحيوانات



﴿ قال إنسان اللي عايش لنفسه وشهواتها ، ولم يستعمل سمعه وبصره وقلبه وعقله ومشاعره في معرفة حقيقة وغاية وجوده ، والارتقاء بأخلاقه وأدبه؛ أصبح وقتها مثل الأنعام ، عايش زيهم للأسف نفس "الحياة الهابطة" "الحياة الدنيئة" اللي لا تساوي في حقيقة الحياة أي شيء! ﴾

﴿ قال الإمام ابن القيم رَحِمَهُ اللهُ فِي مَفْتاح دار السعادة :
[يغلط المغفلون في مسمى الحياة ، حيث يظنونها التَّعَمُّمُ في أنواع المأكَل ، والمشارب، والملابس ، والمناجح ، أو لذَّة المنصب، والمال ، وقهْرُ الأعداء ، والتفنُّن بأنواع الشهوات ، ولا ريب أن هذه لذَّة مُشتركة مع البهائم ، بل قد يكون حظ كثير من البهائم منها أكثر من حظ الإنسان ، فمن لم تكن عنده لذَّة إلا اللذَّة التي تشاركه فيها الحيوانات والدواب ؛ فذلك مسكين! ، همته همَّة حقيرة خسيصة دنيئة !!
ولكن أين هذه اللذَّة من اللذَّة بإيمان ، إذا خالط بشاشته القلوب ؛ أنساه الأبناء ، والأموال ، والأصحاب ، والمساكين ، ورَضِيَ بتركها كلها ، وعرض نفسه لأنواع المكاره والمشايق ، وهو متمتع بهذا ، منشرح الصدر به ، لا تأخذه في ذلك لومة لائم ، حتى إن أحدهم ليلاقى الردى وهو يقول : فُزْتُ وَرَبَّ الكعبة !]

﴿ يعني خلاصة القول؛ إننا نقدر نقول وبكل وضوح إن:

الإنسان بغير إيمان ← حاله أخس من الحيوان !!

كما قال الحق ﷻ :

﴿ إِنَّ هُمْ إِلَّا كَالْأَنْعَامِ بَلْ هُمْ أَضَلُّ سَبِيلًا ﴾ الفرقان: ٤٥

﴿ يقول أحد الأدباء : [هل تأملت القمامة يوماً ١١٩ ، يبدو الأمر مُقزّراً! ، أليس كذلك؟! ، بلى؛ ولكن لو توقّفت قليلاً وتأمّلت ذلك الرُفَات الذي يُزعجك برائحته العُفنة؛ لوجدت أن حاله لا يختلف عن حال جسد الإنسان!]

فذلك الجسد الذي نقضي حياتنا لتنعيمه وتلبية شهواته ، سيضمه القبر يوماً ما ، وستكون رائحته أفج وأعفن من رائحة صندوق القمامة الذي نتأفف منه ، وسيهلك كل عضو فيه كما سيهلك كل شيء في هذه الدنيا !

ولكننا ننسى ما سيؤول إليه في النهاية ، ونحيا لمتعة جسد لن يكبح جماح شهواته سوى جدران ذلك القبر !

إذا؛ فما الفرق في الحياة بين الإنسان وغيره من البهائم والحيوانات إن كان الزوال والهلاك والفضاء مصير الجميع؟!

- "الروح" هي الفرق ، فمن يحيا ليُمَتّع الجسد؛ فإنما يحيا لهدف حقير بال ، أما من يحيا للارتقاء بالروح إلى خالقها، وتركبة النفس بالإيمان، فقد أفلح وسعد في الدارين .

وقال الإمام ابن القيم رَحِمَهُ اللهُ :

[وممّا يدلُّ على أن هذه اللَّذَّاتُ الجسدية ليس فيها السَّعَادَةُ وَالْكَمَالُ ، أن القلبَ كُلَّمَا مرَّ به شيءٌ محبوبٌ ، مَال طَبْعُهُ إِلَى الْوُصُولِ إِلَيْهِ ، فَإِنْ لم يَقْدِرْ عَلَى تَحْصِيلِهِ ، تَأَلَّمَ وَتَعَذَّبَ بِفَوَاتِهِ ، وَإِنْ قَدَرَ عَلَى تَحْصِيلِهِ ، تَأَلَّمَ فِي طَرِيقِ الْحُصُولِ عَلَيْهِ بِالتَّعَبِ وَالْمَشَقَّةِ وَمُنَازَعَةِ الْغَيْرِ لَهُ ، ثُمَّ يَتَأَلَّمُ بَعْدَ ذَلِكَ حَالِ حُصُولِهِ خَوْفًا مِنْ فِرَاقِهِ ، ثُمَّ إِذَا فَارَقَهُ ، يَظَلُّ يَتَأَلَّمُ عَلَى ذَهَابِهِ !

فَعَلِمَ أَنَّ هَذَا الْقَلْبَ أَبَدًا مُسْتَغْرَقٌ فِي بَحَارِ الْهَمُومِ وَالْغُومِ وَالْأَحْزَانِ ، وَأَنَّ نَفْسَهُ تَضْحَكُ عَلَيْهِ ، وَتَرْضِيهِ بِوَزْنِ ذَرَّةٍ مِنْ لَذَّتِهِ ، فَيُغِيبُ بِهَا عَنْ شَهْوَةِ الْقَنَاظِيرِ الْمُقَنْطَرَةِ مِنْ أَلَمِهِ وَعَذَابِهِ فِي سَبِيلِ تَحْصِيلِ تِلْكَ اللَّذَّةِ !

فَإِذَا حِيلَ بَيْنَهُ وَبَيْنَ تِلْكَ اللَّذَّةِ ، وَلَمْ يَبْقَ لَهُ إِلَيْهَا سَبِيلٌ ، أَحَاطَ بِهِ ذَلِكَ الْأَلَمُ ، وَاسْتَوْلَى عَلَيْهِ مِنْ كُلِّ جِهَاتِهِ ، فَقُلْ مَا شِئْتُ فِي حَالِ عَبْدٍ قَدْ غُيِبَ عَنْهُ سَعْدُهُ وَحُظُوْظُهُ وَأَفْرَاحُهُ ، وَأَحْضَرَ شِقْوَتَهُ وَهَمُومَهُ وَغُمُومَهُ وَأَحْزَانَهُ !

وَأَمَّا غِنَى الْعِلْمِ وَالْإِيمَانِ ، فَدَائِمُ اللَّذَّةِ ، مُتَّصِلُ الْفَرَحَةِ ، مُقْتَرَنُ بِأَنْوَاعِ الْمَسْرَةِ وَالْبَهْجَةِ ، لَا يَزُولُ فَيُحْزَنُ ، وَلَا يَفَارِقُ فَيُؤْلَمُ ؛ بَلْ حَالُ أَصْحَابِهِ كَمَا قَالَ اللَّهُ تَبَارَكَ وَتَعَالَى فِيهِمْ :

﴿ لَا خَوْفٌ عَلَيْهِمْ وَلَا هُمْ يَحْزَنُونَ ﴾ [

﴿١﴾ وعلشان كده؛ نقدر نقول باختصار إن :

السعادة الحقيقية في الحياة ⇨ هي القرب من الله

﴿٢﴾ لأنها إذا تحققت ، محدش في الكون كله يقدر يسلبها منك ، وده لأنها نابعة من جواك ، مش من أي شيء مادي خارجي ، وبالتالي لو تحصّلت عليها ، هتكون دائماً مرتاح ، لأنك مش خايف على فقدها ، حتى في أحلك الظروف !

ده غير إنك تقدر تستحضرها في قلبك في أي زمان وأي مكان، ليلاً ونهاراً ، حتى لو كنت في بطن الحوت !!!

✓ يعني السعادة الحقيقية مستحييييل حد هيلاقياها غير في الاستجابة لله ﷻ ولسوله ﷺ ، كما قال تعالى :

﴿ يَا أَيُّهَا الَّذِينَ آمَنُوا اسْتَجِيبُوا لِلَّهِ وَلِلرَّسُولِ

إِذَا دَعَاكُمْ لِمَا يُحْيِيكُمْ ﴾ الأنفال: ٢٤

﴿٣﴾ يعني إيه الآية دي يا شباب ؟؟؟؟

﴿٤﴾ يعني الإنسان وهو بعيد عن ربنا ⇨ إنسان ميت !!!

حتى وإن كان نبضه شغال وقلبه بيدق؛ لكنه ميت الروح !!
عايش بالجسد فقط ، حياة شكلية بلا أي طعم ولا معنى!

« الإنسان اللي بيعصي ربنا ومش عايز يتوب ، ما هو إلّا إنسان ميّت ، دافن نفسه في ظلمات المعصية !!
ومش هيخرج لنور الحياة غير لما يتوب ويطيع ربنا
ويلتزم بأوامره ، ساعتها بس هيبقى اتولد من جديد ،
 وهيحس بمعنى الحياة ، ويبدأ يعيش السعادة بجد ..

☛ **يعني إنت بدون الاستجابة لأوامر ربنا مش عايش!**
 إنت من غير الصلاة ميّت !! من غير القرآن ميّت !!
 إنتي من غير حجابك الصح ميّنة !!
 من غير أخلاق النبي ﷺ وسنته ميّنة !!
 و اللي هيجيئنا ويعيشنا أحلى حياة بجد هو :
 ☑ **التزامنا بأوامر الله ﷻ ، وبعдна عن نواهيه**

« ف اللي خايفين من الدين ، وبيقولوا إن الواحد لو التزم هيدفن نفسه ، وهيقضيها خنقة وكأبة وملل؛ **هؤلاء والله مساكين!!**



« لأنهم لو جربوا طعم الإيمان وداقوا لذة الطاعة وحلاوتها ، كانوا عرفوا وقتها مين اللي عايش بجد! ، ومين اللي ميّت!



أكيد فيه سر !!

﴿ وقبل ما أقولكم على السر ، تعالوا نفكر مع بعض شوية ..
 < تفكروا إن ممكن واحد يعمل حاجة معينة ، مع إنها شاقة جداً
 على نفسه ومش بيحبها ؟؟؟؟ ﴾

« آه ، ممكن أحياناً نعمل حاجات مش بنحبها لإننا
 مضطرين نعملها ؛ بس ساعتها بنعملها يادوب تقضية واجب ..

< طيب .. لو لقيت واحد بيعمل حاجة ومهتم بها أوي ، وعَمَال
 يحسن فيها .. وكمان بيعملها بكامل اختياره .. هتقول إيه ؟؟

« هتقول أكيببيد إنه مُستمتع بالحاجة دي وبيحبها ..
 وحتى لو كانت الحاجة دي في نظرك مُتعبة ، فأكيد فيه
 حاجة تانية بتهوّن عليه التعب ده !!

﴿ طيب؛ بعد الكلام اللي فات ده بقى؛ لما تشوف واحد؛
 ما بيدخنش سجائر ، ما بيعرفش بنات ، ما بيسمعش أغاني ..
 ما بيشوفش أفلام ، وبيصلي في المسجد وبيحفظ قرآن .. إلخ ..
 هتبص له وتقول : إيه ده ١١٩٩ هو مفضلها كدة ليه ١١٩٩
 وبعدين هو ثابت إزاي ١٩٩ هو بجد ما بيزهقش ١٩٩؟

أكيببيبيبيبيد فيه سر !!!!

﴿ يا ترى إيه السرّ اللي ممكن يخلي الناس دي صابرة
ومستمرة وثابتة على الطاعة ؛ رغم كل التعب والإغراءات ؟ ﴾

→ السرّ يكمن في كلمة واحدة :

♡ (الحلاوة) ♡

أيوه .. (حلاوة الإيمان) اللي استمتعوا بها ،
و (لذة العبادة) اللي ذاقوها ..

﴿ وده لأن النفس لما تترك لذة أبداً ، إلا إذا وجدت
لذة أعظم منها وأكمل .. وطبعاً مفيش لذة أعظم وأكمل
وأحلى وأجمل من (حلاوة الإيمان) ..

﴿ (حلاوة الإيمان) هي الحاجة اللي بتخلي المؤمن
يستلذّ بطاعته مهما طالت ، ويستمتع بعبادته حتى لو كان
فيها تعب جسدي ، ويصبر على ترك اللذات الحسية
والشهوات الدنيوية مهما كانت كثيرة ومُغرية وتحت إيديه ؛

﴿ (حلاوة الإيمان) من أهم مفاتيح الثبات على الطاعة ،
وسرّ الصمود أمام الفتن والشهوات بعد فضل الله ﷻ ..

﴿وبعد ما عرفنا السرّ ؛ تعالوا نفهم الموضوع بشيء من التفصيل :

﴿الله ﷻ خلقنا ، وأخبرنا في كتابه الكريم إزاي نعيش الحياة السعيدة، فقال تبارك وتعالى: ﴿مَنْ عَمِلَ صَالِحًا

مِنْ ذَكَرٍ أَوْ أُنْثَى وَهُوَ مُؤْمِنٌ فَلَنُحْيِيَنَّهٗ حَيَاةً طَيِّبَةً وَلَنَجْزِيَنَّهُمْ أَجْرَهُمْ بِأَحْسَنِ مَا كَانُوا يَعْمَلُونَ﴾ ﴿الأنعام : ٩٧﴾

﴿طبعاً كلنا بنصدق ربنا تبارك وتعالى.. وربنا قال :

﴿مَنْ عَمِلَ صَالِحًا﴾ يعني اللي هيمشي في طريق ربنا ﷻ وهيحقّق الإيمان، وينفّذ اللي ربنا أمره به من عمل صالح، ويبعد عن اللي نهاه عنه، هيكون شكل حياته إيه ساعتها؟؟

﴿فَلَنُحْيِيَنَّهٗ حَيَاةً طَيِّبَةً﴾

♡ حياة طيبة = يعني راضي، يعني مطمئن، يعني مرتاح،

يعني مبسوط ومستمتع وفرحان بطاعته وقربه من الله

يعني لما أي حاجة بتتعبه في الدنيا، حلها عنده موجود ،

هيرفع إيديه ويقول "يارب" ، وبمجرد ما ينتهي؛ تلاقيه في

قمة الراحة ، وكأن مشاكله كلها اتحلت ، وكل تعب راح!

❦ ده الصلاة الواحدة يؤدِّيها المسلم، فرض واحد بس من فروض ربنا ﷺ، بمجرد ما بينتهي من ركوعه وسجوده ومناجاته لخالقه وحببيه؛ بيحس براحة نفسية رهيبة، والله العظيم لو الواحد دفع فلوس الدنيا كلها علشان يشتري الراحة دي؛ ما هيعرف يشتريها !

♥ ده فرض واحد ، أمر واحد من أوامر ربنا !
♥ ما بالك بباقي الفروض والأوامر لو نفذتها
هتفلي حياتك شكلها إيه وطعمها إيه ؟!!

♥ وده لأن الله ﷻ جعل راحة الأرواح في القرب منه ،
فالحياة السعيدة مش هتكون غير في جواره ﷻ ..

فالحياة إذا لم تطب وتُسعد بالقرب من الله ﷻ ،

❦ فَمَنْ غَيْرَ اللَّهِ تَطِيبُ وَتُسْتَرِيحُ !!

❦ الحياة الطيبة : فيها الفرح بالله ، والثقة في موعوده ،
والاطمئنان لستره وحفظه ولطفه وعونه وتدبيره وتوفيقه ..

❦ الحياة الطيبة : فيها راحة البال والإحساس بالأمن
والسكينة ، وعدم القلق أو الخوف من أي شيء ..

❦ الحياة الطيبة : فيها الأمل والتفاؤل وحسن الظن بالله



❁ **الحياة الطَّيِّبَة :** فيها السلام النفسي ، وصفاء الذهن ، وطمأنينة القلب ، وانسراح الصدر ، وراحة الضمير ..

❁ **الحياة الطَّيِّبَة :** فيها طيب زوجة ، وصلاح وهداية ذُرِّيَّة .. فيها استقرار البيوت ومودة القلوب ..

❁ **الحياة الطَّيِّبَة :** فيها البركة .. الحاجة التي بتعمّر كل حاجة في حياتك ، وتخلّيك تستمتع بها بجد ..

❁ **الحياة الطَّيِّبَة :** فيها الألفة والتعايش وحُبّ الناس ، وخاصة الصالحين منهم ، وتقديرهم واحترامهم لك ..

❁ **الحياة الطَّيِّبَة :** فيها الرِّضَا والقناعة ؛ ودي قَمَّة الحياة الطيبة ، لأنّ الله ربَّنَا ﷻ هيقنَّعه بما قسم له من رِزق، مش هيتعب ويشقى في الجري والتَّكالب على الدنيا ، ولا هيحزن ويتكدَّر على الله هيفخسه أو يفوته منها ، أو هيتحسَّر على أي شيء نفسه فيه بس مش عارف يحصِّلَه!

❁ **الحياة الطَّيِّبَة :** الضَّامن فيها مش فلوس في البنك ، ولا منصب كبير ، ولا أي شيء ممكن يزول في أي وقت !! الضامن هو الملك القدير ﷻ الذي بيده كل شيء في الكون

❁ **الحياة الطَّيِّبَة :** حياة جميلة.. بل هي أجمل ما يكون .. لأنها حياة بالقرب من " الله الجميل " ، التي جمال الكون كله ، ما هو إلّا بعض آثار جماله تبارك وتعالى ..



✓ يبقى ده وَعْد من ربنا ﷺ بالحياة الطيبة في الدنيا لكل واحد هيطيعه ويختار طريقه ويمشي فيه ..

طيب في الآخرة بقى؛ يا ترى إيه المكافأة اللي في انتظاره ؟؟ ياترى هيكون جزاءه إيه يارب ؟؟ - قال الله تعالى:

﴿وَلَنَجْزِيَنَّهُمْ أَجْرَهُمْ بِأَحْسَنِ مَا كَانُوا يَعْمَلُونَ﴾

«يعني أحسن أجر ، وأحسن مكافأة ، وَعْد لهم من الله ﷻ في جنة الخلد والنعيم المقيم من فضله وكرمه ورحمته

إِذَا؛ المُعَادِلَةُ الْإِيمَانِيَّةُ الَّتِي نَسْتَخْلَصُهَا مِنَ الْآيَةِ الْكَرِيمَةِ:

إِيمَانُ صَادِقٌ + عَمَلٌ صَالِحٌ =

حَيَاةٌ سَعِيدَةٌ طَيِّبَةٌ

« ونفس المعنى ده موجود في قول الله تبارك وتعالى :

﴿وَالَّذِينَ آمَنُوا وَعَمِلُوا الصَّالِحَاتِ وَآمَنُوا بِمَا نُزِّلَ عَلَى مُحَمَّدٍ

وَهُوَ الْحَقُّ مِنْ رَبِّهِمْ كَفَرَ عَنْهُمْ سَيِّئَاتِهِمْ وَأَصْلَحَ بَالَهُمْ﴾

﴿الآية دي خبر مُحَقَّق، القرآن عَبَّرَ عَنْهُ بِصِيغَةِ الْمَاضِي (كَفَّرَ) وَ (أَصْلَحَ) ؛ لِيَعْلَمَ الْجَمِيعُ بِأَنَّهُ وَعْدٌ حَقٌّ لَا يَتَخَلَّفُ.

﴿فَ الّٰي هِيَحَقُّ الْإِيْمَان فِي قَلْبِهٖ ، وَيَتَّبِعُهٗ بِالْأَعْمَالِ الصَّالِحَةِ،
فَهُوَ مُوْعِدٌ مِّنَ اللّٰهِ ﷻ وَعَدًا صَادِقًا بِمَكَافَأَتَيْنِ :

① **تَكْفِيرُ السَّيِّئَاتِ :** يَعْنِي سَتْرَهَا ، وَالتَّجَاوُزَ عَنْهَا ، وَعَدَمَ مَآخِذَتِهَا بِهَا أَوْ مَعَاقِبَتِهَا عَلَيْهَا ..

② **صَلَاحُ الْبَالِ :** وَهُوَ صَلَاحُ الْأَمْرِ وَالْحَالِ ، بِتَسْيِيرِ شُؤُونِهِ الدُّنْيَوِيَّةِ وَقَضَاءِ حَوَائِجِهِ ، وَإِرْشَادِهِ لِأَعْمَالِ الْبِرِّ وَالْخَيْرِ ، وَكَذَلِكَ بِأَنْ يَرْزُقَهُ اللّٰهُ الْكَزْنَ الْأَعْلَى وَهُوَ الرِّضَا .

﴿ وَطَبَعًا لِّمَا تَكُونُ أَحْوَالُ الْإِنْسَانِ مَتَّيْسِرَةً بِالشَّكْلِ دَهْ ، أَكِيدُ بِأَلِهٖ هِيرَتَاحْ ، وَهِيْنَامْ قَرِيرِ الْعَيْنِ ، مُطْمَئِنِّ النَّفْسِ ، صَافِي الذَّهْنِ ، مَسْرُورِ الْقَلْبِ ، طَيِّبِ النَّفْسِ ، مُشْرِقِ الرُّوحِ .

﴿ وَفِيهِ مِلَاحَظَةٌ لِّطَيِّفَةٍ جَدًّا فِي الْآيَةِ ، أَلَا وَهِيَ :

إِنْ رَبَّنَا ﷻ قَدَّمَ تَكْفِيرَ السَّيِّئَاتِ عَلَى إِصْلَاحِ الْبَالِ ، وَدَهْ فِيهِ إِشْعَارًا بِأَنَّ الْإِنْسَانَ يُؤْتَى مِنْ قَبْلِ سَيِّئَاتِهِ ، وَأَنَّهَا سَبَبُ كُلِّ الْمَشَاكِلِ وَالْهَمُومِ وَالْغُمُومِ وَالْأَحْزَانِ وَاضْطِرَابِ الْحَالِ !

فَلَا زَمَ الْكُلَّ يَعْرِفُ إِنْ "رَاحَةُ الْبَالِ" لَنْ تَتَأْتَى أَبَدًا مَعَ فَعْلِ الْمَعَاصِي وَالْإِصْرَارِ عَلَيْهَا وَعَدَمِ تَجْدِيدِ التَّوْبَةِ بَعْدَ فَعْلِهَا .

﴿ يا شباب .. يا كل حد يقول إن الدين والالتزام خنقة وكآبة .. يا أي حد متصور إن اللي هيمشي في طريق ربنا هيسيب كل متع الدنيا ويعيش في بؤس وحزن؛ مين اللي وصل لكم التَّصوّر ده ١٩ ، مين قال إنك هتحرّم نفسك من متع الدنيا؟ ١٩ ، مين الشيطان اللي قالك كده ١٩

﴿ يا شباب .. حقيقة الدين هي إن :

(الإسلام ليس مجموعة قيود ؛ بل هو مجموعة حدود)

﴿ للأسف البعض يتوهم إن الدين هيقيد حياته ، ومش هيخليه يعرف يتمتع بأي حاجة .. وده مفهوم خاطئ بكل تأكيد.. لأن كل أحكام الدين ما هي إلا ضمانات لسلامتك وسعادتك في الدنيا والآخرة ، وليس فيها أي حرمان ..

✓ والله ﷻ لما خلق الشهوات ، جعل لها في الدين مُتنفّس شرعي ، وطرق حلال نظيفة لتصريفها .. فمش هتلاقي مُتعة حرام إلا وفيه مُتعة حلال زيها؛ بل وأفضل!

﴿ وأي واحد فينا لما يشوف لوحة مكتوب عليها :

× ممنوع الاقتراب ، حق النام ×

مستحيل هيشوفها إنها تقيد لحريته ، بل هيشوفها في مصلحته مليون % ، وما هي إلا أكبر ضمان لسلامته



✓ وكذلك؛ أي حد عنده ذرّة عقل ، وشوية فهم ، هيعرف إن كل شيء حرّمه ربنا ﷻ علينا ليس حجر أو تقييد لحريتنا؛ بل هو أمان وضمنان لسلامتنا ، لسلامة صحتك النفسية ، والجسدية ، و سلامة دنياك قبل آخرتك ..

لما تفهم الحقائق دي؛ هتغير نظرتك وتصورك للالتزام جذرياً!

✍ قال الإمام ابن القيم رَحِمَهُ اللهُ فِي "شفاء العليل" :

[**فَأَوْامِرُ الرَّبِّ جَلَّ وَعَلَا رَحْمَةً** وإحسان ، وشفاء ودواء ، وغذاء للقلوب، وزينة للظاهر والباطن، وحياة للقلب والبدن ، وكم في ضمنها من مَسْرَةٍ وفَرَحَةٍ ، وَلَذَّةٍ وَبَهْجَةٍ وَنَعِيمٍ .
فَمَا يُسَمِّيهِ هَؤُلَاءِ تَكَالِيفَ؛ إِنَّمَا هُوَ قَرَّةُ الْعْيُونِ ، وَبَهْجَةُ النُّفُوسِ ، وَحَيَاةُ الْقُلُوبِ وَنُورُ الْعُقُولِ ، وَتَكْمِيلُ لِلْفِطْرَةِ ،
وَإِحْسَانٌ تَامٌ إِلَى النَّوعِ الْإِنْسَانِيِّ ، أَعْظَمُ مِنْ إِحْسَانِهِ إِلَيْهِ
بِالصَّحَّةِ وَالْعَافِيَةِ وَالطَّعَامِ وَالشَّرَابِ وَاللِّبَاسِ .

فَنِعْمَةُ اللَّهِ عَلَى عِبَادِهِ بِإِرْسَالِ الرُّسُلِ إِلَيْهِمْ ، وَإِنْزَالِ كُتُبِهِ عَلَيْهِمْ ، وَتَعْرِيفِهِمْ أَمْرَهُ وَنَهْيَهُ ، وَمَا يَحِبُّهُ وَمَا يَبْغِضُهُ هِيَ
أَعْظَمُ النِّعَمِ وَأَجْلُهَا ، وَأَعْلَاهَا وَأَفْضَلُهَا ؛ بَلْ لَا نِسْبَةَ لِرَحْمَتِهِمْ بِالشَّمْسِ وَالْقَمَرِ وَالْغَيْثِ وَالنَّبَاتِ ، إِلَى رَحْمَتِهِمْ
بِالْعِلْمِ وَالْإِيمَانِ ، وَالشَّرَائِعِ وَالْحَلَالِ وَالْحَرَامِ !



وهل قامت مصالح الوجود إلا بالأمر والنهي وإرسال الرّسل
 وإنزال الكتب؟! ، **ولولا ذلك لكان الناس بمنزلة البهائم!**
 ، يتهارجون في الطرقات ، ويتسافدون (يتناكحون) تسافد
 الحيوانات ، لا يعرفون معروفًا ، ولا ينكرون منكراً ،
 ولا يمتنعون من قبيح ، ولا يهتدون إلى صواب !
 وأنت ترى الأمانة والأزمنة التي خفيت فيها آثار النبوة
 كيف صار حال أهلها؟ ، وما دخل عليهم من الجهل والظلم،
 واستحسان القبائح ، وفساد العقائد والأعمال !
 فإنّ الشرائع تنزيلٌ من الحكيم العليم ، أنزلها وشرّعها
 الذي يعلم ما في ضمناها من مصالح العباد في المعاش والمعاد
 ، وأسباب سعادتهم الدنيوية والأخروية ، **فجعلها غذاء ودواء**
 ، **وشفاء وعصمة ، وحصناً وملجأ ، وجنة ووقاية .**
 وشرائع الربّ تعالى فوق ذلك وأجلّ منه ، وإنّما هو تمثيلٌ
 وتقريبٌ؛ **فلا أحسن ولا أحكم من أمره ونهيه ، وتحليله**
وتحريمه ، أمره قوتٌ للأرواح ، وغذاءٌ للنفوس ، وشفاءٌ
للقلوب ، ونهيه حماية وصيانة .
 فلم يأمر سبحانه وتعالى عباده بما أمرهم به حاجةً منه
 إليهم ، **ولاً عبثاً؛ بل رحمةً بهم وإحساناً ومصلحةً .**
 ولما نهاهم عما نهاهم عنه بخلاً منه عليهم؛ بل حمايةً
 وصيانةً عما يؤذيهم ويعودُ عليهم بالضرر إن فعلوه . [

✓ وتأملوا في خطاب الله ﷻ وهو يقول للنبي ﷺ :

﴿ مَا أَنْزَلْنَا عَلَيْكَ الْقُرْآنَ لِتَشْقَى ﴾ طه: ٢

﴿ يعني الدين ده والمنهج ده مستحيل يكون سبب شقاء لك أو لأي حد ، الدين ده عمره ما هيكون سبب للحزن أو البؤس أو الخنقة ، بل على العكس تماماً؛ الإسلام هو دين السعادة والتفاؤل والبسمة والفرح ..

ولما شقاء مع الإسلام رغم كل ما يواجهه المسلم في حياته بل الشقاء كله سببه ﴿ البعد عن شرع الله وترك منهجه

﴿ وتصديقاً للآية السابقة، يقول تعالى في كتابه الكريم:

﴿ فَمَنْ اتَّبَعَ هُدَايَ فَلَا يَضِلُّ وَلَا يَشْقَى ﴾ طه: ١٢٣

﴿ يعني أي حد هيمشي في طريق ربنا ﷻ ويتبع منهجه فلن يضل ، ولن يشقى ، لا في الدنيا ، ولا في الآخرة ..

إزاااي تشقى و أنت مع الرحمن؟؟!

﴿ وكذلك قوله تعالى :

﴿ فَمَنْ تَبِعَ هُدَايَ فَلَا خَوْفٌ عَلَيْهِمْ وَلَا هُمْ يَحْزَنُونَ ﴾



﴿ وبالجمع بين الآيتين ، تكون النتيجة الحتمية الرائعة

إن الي هيتبع منهج ربنا ﷺ ويطيعه ويسعى لرضاه :

✓ **مضمون له: السعادة والهدى**

وصلاح الحال في الدنيا ، وفي الآخرة ..

✗ **ومنفي عنه: الخوف والحزن والضلال**

والشقاء في الدنيا ، وفي الآخرة ..

﴿ **حد عايز حاجة أكثر من كده تاني؟!**

► أحد الشباب يبكي ويقول :

أنا شاب عادي جداً ، ٣٥ سنة ، مهندس من عائلة ميسورة جداً ، عايش حياتي زي ما أنا عايزها ، وبعمل كل الي نفسي فيه ، وما عنديش مشاكل من أي نوع .

طول عمري شخص عقلاني جداً ، يعنى بافكر في كل حاجة بدماغي ، ومش باقتنع غير بالأشياء المنطقية ، ومؤمن جداً إن كل شيء وله سبب .

أنا باتكلم بصراحة وبمنتهى الأمانة ، لأنني مُعتقد إن أنا نجحت واشتغلت في مكان كويس ، لأن أسباب النجاح كانت



موجودة ، لكن لو ماكانتش موجودة؛ كان عمر ما فيه حاجة هتحصل ، حتى لو عملت إيه ، هو ده اعتقادي ! وهكذا ، بالنسبة لموضوع السعادة ، أنا ببقى مبسوط لاني معايا فلوس وعندي عربية وبقدر أتفسح في أي مكان ، وحواليا جميع وسائل الراحة والرفاهية ، اللي أنا شايفها وسائل تحقيق السعادة !

وعلشان كده عمري ما دعيت ولا طلبت حاجة من ربنا !! أنا كنت مقتنع بكلامي ده ١٠٠ % ، لغاية رمضان اللي فات، لما اشتغل معايا زميل جديد في الموقع ، وكان من الشباب المتديّنين ، وقعد معايا في السكن . هو شكله كان عادي جداً، وبيضحك ويهزّر وكل حاجة، لكن كان مختلف في حاجات كتير عن أغلب الموجودين في المكان، فكان بيحافظ على الصلوات الوقت بوقته بالظبط ، وبيصوم اتنين وخميس على طول صيف وشتا !!

واللي خلّاني بقى هاتجنّن منه بجد ، إنه كان بيقف يصلي قيام الليل بتاع ساعة أو ساعتين كل ليلة !! ، بالرغم من (هدة الحيل) اللي بنكون فيها طول النهار !!

إحنا بنشتغل في مواقع في الصحراء ، وفي ظروف غاية في القسوة والصعوبة !!



فكون إنه يصوم في الظروف دي ، أو إنه بعد يوم طويل
صعب جاف زى يومنا ده يقف يصلي كده ، ده فعلاً اللي
ماكنتش فاهمه إطلاقاً ، وكان هيجنني بجد !!

رُحّت كلمته مباشرة وقلت له: إنت إزاي بتعمل كده؟!!

إزاي بتستحمل الصيام في الجو ده ؟!!

إزاي بتستحمل الوقفة طول المدة دي كلها ؟!!

لأ ويومياً بتعمل كده؟ ، إنت مابتزهقش؟ ، ما بتتعبش؟!!

تعرفوا ردّ عليا وقال لي إيه ؟؟؟؟

قال لي : أزهق من مُتعتي ؟؟؟

قلت له : مُتعتك ؟! ، هو فين المتعة في كده ؟؟؟

فضل يكلمني عن إحساسه وهو بيصلي ، وهو بيدعي ،
وحلاوة إحساس القرب والآنس لما بيكون في خلوة مع ربنا
، وكلام كبير أووووووي الصراحة !!

بس طبعاً الكلام ده ماكانش داخل عقلي خالص !!

ما هو يا إمّ الراجل ده واللي زيّه بيمثلوا عليا وبيضحكوا
على نفسهم ، يا إمّ المشكلة عندي أنا ، وأنا فعلاً اللي ما
بحسش بقى !!

نزلت إجازة العيد ، وانبسّطت تمام التمام ، لكنّي كل ما
كنت باعمل حاجة تبسطني ، كنت بقول في نفسي:



يا ترى صاحبنا ده بيكون مبسوط زيّ كده وهو بيصلي؟
طيب لو ده صحيح؛ هل أنا ممكن أحسّ نفس الإحساس
بتاعه ده في يوم من الأيام ؟ ولا دي حاجة خيال علمي؟

المهم؛ سبت صاحبي ده شوية، وإذا بيوم عرفة اللي فات ،
فتحت التليفزيون بالصدفة على القناة اللي جايه الحجاج
، لقيت ناس كتير أوي واقفة على جبل عرفات بتدعي
وتعيط ، فسألت أمي زي العيل الصغير:

هو فيه إيه بالضبط ؟؟ ، هو ليه كل دول بيعيطوا ؟؟؟

قالت لي: **من الفرحة يا ابني! ، دول ضيوف ربنا !**

قلت في نفسي : بيعيطوا من الفرحة؟؟، يعني الناس دي
فرحانة بجد؟! ومبسوطة بجد؟! ، معقول الكلام ده ؟؟

**معقول ممكن واحد يفرح لدرجة إنه يبكي من الفرح من
غير ما يكون معاه فلوس وعربية وبيخرج وبيتفصح وعنده
شلة أصحاب وكده ؟؟**

**معقول ممكن الدين بتاعنا يكون فيه السعادة والأحاسيس
الجميلة دي ، بس إحنا اللي مش بندور عليها ؟؟؟؟**

أنا كنت معتقد طول عمري إن الصلاة والصوم والحج
والحاجات دي إحنا بنعملها لأنها أوامر ، زي الأوامر
العسكرية كده ، ولنازم نتنفذ ، وإلا ربنا هيعاقبنا !



كنت مُعتقد إن ربنا عايزنا نعملها كعبادة له وخلص ، إنما عمري ما تخيلت في يوم من الأيام إن مُمكن يكون فيها سعادة ولذّة ومنتعة زي ما شوفت وسمعت من الناس!

علشان يتضح لي في النهاية إن الدين مش أوامر ونواهي؛ وإنما هو كتالوج السعادة الحقيقية في الحياة، وأي سعادة تانية بتحققها الفلوس أو أي وسيلة ترفيه في الدنيا ما تجيش أي شيء مقارنة بسعادة القلب وهو قريب من ربنا.



﴿ سبحان ربّي ، كلام الشاب ده ، بيدكرني بحديث الصحابي الجليل عبد الله بن عمرو ؓ الذي قال فيه :

[جَمَعْتُ الْقُرْآنَ فَقَرَأْتُهُ كُلَّهُ فِي لَيْلَةٍ ، فَقَالَ لِي النَّبِيُّ ﷺ :
إِنِّي أَخْشَى أَنْ يَطُولَ عَلَيْكَ الزَّمَانُ وَأَنْ تَمَلَّ؛ فَاقْرَأْهُ فِي شَهْرٍ
فَقُلْتُ يَا رَسُولَ اللَّهِ : "دَعْنِي أَسْتَمْتِعَ مِنْ قُوَّتِي وَشَبَابِي"

فَقَالَ: فَاقْرَأْهُ فِي عَشْرَةِ ، قُلْتُ: دَعْنِي أَسْتَمْتِعَ مِنْ قُوَّتِي وَشَبَابِي
قَالَ: فَاقْرَأْهُ فِي سَبْعَ ، قُلْتُ: دَعْنِي أَسْتَمْتِعَ مِنْ قُوَّتِي وَشَبَابِي]

﴿ "سيبونا نعيش اللحظة" ، "عايزين نتمتع بشبابنا" ﴾

هو ده نفس الكلام اللي الشباب بيقلوه دلوقتي ، هو قاله من قبلهم ، بس هو كان عايش شبابه مع القرآن أحلى عيشة بجد !



❖ ولو تأملنا في معاصينا يا شباب ، هنلاقي إن أي حد فينا بيعمل معصية معينة، بيعملها علشان فاكّر إنه هياخد منها لذة ومُتعة؛ بس للأسف بننسى إن لذة المعصية لها خاصية؛ وهي إنك (لو إنت بعيد عن ربنا) ممكن في لحظتها بس تحس إنك مبسوط ومستمتع .. ولكن شوية ، وهتحس بعدها إنك قرفان ومخنوق ومش طايق نفسك !! ، مع إن كل حاجة في حياتك ممكن تكون ماشية تمام !!

❖ مش إنت عايز تبقى مبسوط؟ وكل الناس كذلك..

بس ينفع تدور على أهرامات الجيزة في فرنسا؟؟!!
لو لفيت إيطاليا شبر شبر؛ مش هتلاقيها !! ، ليبينه ١٩٩

❌ لأنك بتدور في المكان الغلط !

لأنها بكل بساطة في الجيزة !!

❖ يعني لو دورنا على السعادة والراحة في الدنيا كلها، مش هنلاقيها إلا في العمل الصالح زي ما الآيات السابقة ذكرت

✓ وبناءً عليه؛ اللي ممكن تشوفه وتقول عليه معقد ومش سعيد ، هتلاقيه سعيد جداً ومرتاح على الآخر .. ليه ٩٩٩٩

✓ لأنه دور في المكان الصح ..

وَبَحَثْتُ عَنْ سِرِّ السَّعَادَةِ جَاهِدًا * فَوَجَدْتُ هَذَا السِّرَّ فِي تَقْوَاكَ
فَلْيَرْضَ عَنِّي النَّاسُ، أَوْ فَلْيَسْخَطُوا * أَنَا لَمْ أَعُدْ أَسْعَى لِغَيْرِ رِضَاكَ

✕ لكن اللي بيدور في المكان الغلط .. اللي فاكر إنه هيلاقى السعادة في طريق المعصية؛ والله العظيم ما هيلاقى غير الضنك والبؤس والتعاسة ، كما قال ﷺ :
 ﴿وَمَنْ أَعْرَضَ عَن ذِكْرِي فَإِنَّ لَهُ مَعِيشَةً ضَنْكًا﴾

طه : ١٢٤

➡ عيشته في الدنيا **ضنك** = يعني شقاء و ألم و حزن و خنقة و ضيق و ملل و هموم و قلق و حيرة و تشتت !
 ➡ **الضنك** ← يعني كأنه عايش في "قبر" من الضيق والخنقة !

📖 قال الإمام ابن كثير رَحِمَهُ اللهُ في تفسيره :

[مَعِيشَةٌ ضَنْكًا) أي: لَا طُمَأْنِينَةَ لَهُ ، وَلَا انْشِرَاحَ لصدْرِهِ ؛ بَلْ صَدْرُهُ ضَيِّقٌ حَرَجٌ ، وَإِنْ تَنَعَّمَ ظَاهِرُهُ ، وَلَبَسَ مَا شَاءَ ، وَأَكَلَ مَا شَاءَ ، وَسَكَنَ حَيْثُ شَاءَ !]

📖 وقال الإمام ابن القيم رَحِمَهُ اللهُ في "الجواب الكافي" :

[الْمُعْرِضُ عَنِ اللَّهِ لَهُ مِنْ ضَنْكِ الْمَعِيشَةِ بِحَسَبِ إِعْرَاضِهِ ، وَإِنْ تَنَعَّمَ فِي الدُّنْيَا بِأَصْنَافِ النَّعْمِ ، فَفِي قَلْبِهِ مِنَ الْوَحْشَةِ وَالذُّلِّ وَالْحَسَرَاتِ مَا يُفْتَتُّ الْقُلُوبُ !]

﴿ وقال أيضاً رَحِمَهُ اللهُ فِي "زاد المعاد" :

[ومن أعظم أسباب ضيق الصدر؛ الإعراض عن الله تعالى، وتعلق القلب بغيره ، والغفلة عن ذكره ، ومَحَبَّة سواه ، فَإِنَّ مَنْ أَحَبَّ شَيْئًا غَيْرَ اللَّهِ؛ عَذَّبَ بِهِ ، فَمَا فِي الْأَرْضِ أَحَدٌ أَشَقَّى مِنْهُ ، وَلَا أَنْكَدُ عَيْشًا ، وَلَا أَتَعَبُ قَلْبًا !]

﴿ لازم تصدَّقوا يا شباب حبسكم النبي ﷺ اللي يقول :

(تَعِسَ عَبْدُ الدِّينَارِ وَالدِّرْهَمِ ، تَعِسَ وَانْتَكَسَ)

"تعس" : يعني هيعيش حياته كلها تعاسة وخنقة ! !

﴿ ف اللي هيعيش أسير وعبد لشهواته .. اللي بيقول مش هقدر أبطل معاصي ! ، أصل أنا بحب الحاجات دي ومش هقدر أستغنى عنها أو أعيش من غيرها ! ، هنقولُه :

👉 زي ما تحب ، بس والله لتعيش **أتعس حياة** ! 😞

رسالة لكل واحد مخنوق ومش عارف السبب؟! ✉

👉 لفظ "**الخنقة**" ده أصلًا مذكور في حديث شريف للنبي ﷺ ، بيضرب فيه مثال وتشبيهه بليغ ، بيوضح لنا كلنا إن سبب الخنقة الأساسي هو الذنوب والمعاصي ..

« قال رسول الله ﷺ : (إن مثل الذي يعمل السيئات ثم يعمل الحسنات ؛ كمثل رجل كانت عليه **درع ضيقة قد خنقته** ، ثم عمل حسنة ، فانفكت حلقة ، ثم عمل حسنة أخرى ، فانفكت أخرى ، حتى تخرج إلى الأرض) صحيح

❁ يعني إيه بقى التشبيه اللي في الحديث ده ؟؟

« يعني اللي بيعمل المعاصي والسيئات عايش في ضيق وخنقة كأن فيه سلسلة من حديد ضيقة على صدره ورقبته خنقاه ومقيده ، وكل ما يتوب ويعمل حسنة ، تنفك حلقة من السلسلة دي ، لحد ما يتخلص منها ، كأنه خرج من سجن ضيق أوووووي ، لأرض فضاء واسعة جداااااااا ..

❁ قال الإمام المناوي رَحِمَهُ اللهُ في شرح الحديث :

« عَمَلُ السيئات يُضَيِّقُ صدر العامل ورزقه ، ويُحَيِّرُهُ في أمره ، فلا يَتيسَّرُ له في أموره ، ويبغضه عند الناس . فإذا عَمَلَ الحسنات ، تُزِيلُ حسناته سيئاته ، فإذا زالت؛ انشرح صدره ، وتوسَّع رزقه ، وسَهَّلَ أمره ، وأَحَبَّهُ الخلق |

« واللي هيتدبر قول الله ﷻ : **﴿فَفِرُوا إِلَى اللَّهِ﴾** التاريات: ٥٠

هياقي إن التعبير بلفظ "الفرار" تعبير عجيب جدا !!

✎ التعبير بلفظ "الفرار" : يوحي بصعوبة الفتن التي
بتمثل القيود التي بتشد النفس البشرية إلى الأرض ،
وتأسرها ، وتمنعها من الرُّقي والانطلاق إلى الله ﷻ .
«وكان الناس الّلي بعيد عن ربنا عايشة في الدنيا في سجن
وعلشان تدوق طعم الحياة؛ لأزم تهرب وتفرّ من السجن ده وتلجأ
إلى الله ﷻ وتقرب منه ، وإلا؛ محدش يرجع يقول أنا مخنوق
وزهقت من العيشة واللي عايشنها وعايّز أنتحر!

«اجري على ربنا يا حبيب قلبي ..

☑ فرّ إليه من هموك وأحزانك ..

♥ قرّب منه ، وإنت على يقين تام إنك هتلاقي
بجواره الحياة الطيبة الّلي عشت تعلم بها ..

« وتدبّر كمان في قول الله ﷻ في أول سورة الشرح :

﴿ أَلَمْ نَشْرَحْ لَكَ صَدْرَكَ * وَوَضَعْنَا عَنكَ وِزْرَكَ *

الَّذِي أَنْقَضَ ظَهْرَكَ ﴾

(الوزر) : هو الحمل الثقيل المرهق الشاق ، هو الشيء

اللي صعب جداً تشيله ، والمقصود بـ "الوزر" ⇨ "الذنب" !



والقرآن عبّر عن (الذُنُوب) بـ (الأَوْزَار)؛ لأنها هي السبب الأول والرئيسي للتعب والشقاء والعذاب ، وشيل الهمّ كله!

﴿ وَزَرَكَ * الَّذِي أَنْقَضَ ظَهْرَكَ ﴾

﴿ الآية دي بتعرفك إن المعاصي هتقسم وسطك !!

بتقول لك إن آخرة المعاصي إنها هتذلك وتحني ظهرك !!

المعاصي هتجيبك الأرض من شدّة التعب اللي هتسببه لك ،

وكميّة الألم والمشاكل اللي هتشوفها من وراها !!

لدرجة إنها هتخليك مش طايق العيشة

من صعوبة الحمل والضغط النفسي الرهيب اللي عليك !!

► يا شباب .. المعاصي أثقال مُطبقة على الصدر لا تُطاق!

وعلشان كده "**سورة الشرح**" بتقول لك إن الإنسان صدره

مش هينشرح ويسعد ويرتاح غير لما يتوب ويبطل معاصي

، غير كده هيبقى عايش في قمة الخنقة والنكد، وصدره

هيضيق لحد ما يبقى ﴿صَيِّقًا حَرَجًا كَأَنَّمَا يَصَّعْدُ فِي السَّمَاءِ﴾

❁ وإحنا بنذكر الآيات والأحاديث دي كلــــها ،

علشان محدش يقعد يقول إنتم دراويش! ، ومزودينها أوي

في حكاية علاقة المعاصي بالخنقة والاكْتئاب والكلام ده !



☛ ده غير إن لفظ "**الضيق**" مذكور في القرآن في وصف حال الصحابة اللي عصوا أمر واحد من أوامر النبي ﷺ ، وتخلّفوا عن الخروج معه .. قال الله ﷻ في وصفهم :

﴿ حَتَّىٰ إِذَا ضَاقَّتْ عَلَيْهِمُ الْأَرْضُ بِمَا رَحُبَتْ ﴾

☛ يعني بقى كل واحد فيهم حاسس إن الدنيا كلها اسودّت واتقفّلت في وشّه ! ، حاسس إن الكرة الأرضية بوسعها وطولها وعرضها بقت أضيق من القبر !! ، وخلاص ما بقاش طايق فيها أي حاجة ، ولا مستعد يروح أي مكان !!

﴿ وَضَاقَتْ عَلَيْهِمُ أَنْفُسُهُمْ ﴾

☛ يعنى إيه نفسي تضيق عليا؟ ☛ يعني يبقى جواك مشاكل وهموم وصراع داخلي رهيب عايز تهرب منه ، بس إزاي هتهرب من نفسك؟! ☛ فتلاقيك مخنوق خنقة السنين !

﴿ وَظَنُّوا أَن لَّا مَلْجَأَ مِنَ اللَّهِ إِلَّا إِلَيْهِ ﴾

☛ يعني تأكدوا خلاص إن مفيش حل لهم والغم اللي هم فيه غير باللجوء إلى الله، هو ده الحل الوحيد للأزمة دي!

التوبة: ١١٨

﴿ ثُمَّ تَابَ عَلَيْهِمْ لِيَتُوبُوا ﴾

☑ هو ده العلاج الشافي للضيق والخنقة ☛ التوبة إلى الله

﴿ومصدقاً لكل الآيات والأحاديث التي ذكرناها؛ قوله ﷺ:

﴿وَمَنْ يُعْرِضْ عَنْ ذِكْرِ رَبِّهِ يَسْلُكْهُ عَذَابًا صَعَدًا﴾

الجن: ١٧

﴿ قال المفسرون (عذاباً صَعَدًا): أي مَشَقَّةٌ لا راحة معها يعني إياه؟ يعني كل ما يخرج من مشكلة؛ يلاقي مشكلة !

(عذاباً صَعَدًا): يعني عذاب مُتَصَاعِد.. كل يوم في زيادة!

يعني كل ما يدخل في طريق المعصية ، يحسّ إنه متضايق ومكتئب ومقضول ومخنوق ، ومش طايق نفسه ، ولا طايق أهله ، ولا طايق البنات ، ولا طايق أي حاجة !

يقوم يهرب من المعصية لمعصية ثانية .. رحلة أو سهرة أو قعدة أو أي حاجة تفرّشه؛ يقوم العذاب يزيد أكثر !

👉 وكل ما يمشي في السَّكَّة دي أكثر؛ العذاب يتصاعد أكثر، يقوم يروح يعمل معاصي أكثر.. والعذاب يزيد أكثر وأكثر!

﴿ لحد ما يكره نفسه ، ويكره حياته ، والدنيا كلها !

👉 يقوم يبجي الموت ، فيقول أخيراً هموت وهستريح من الدنيا دي!، يُفاجأ إن سَكَرَات الموت وعذاب ألم خروج الروح ➡ أشد ١٠٠٠ مرة من كل اللي داقه في حياته!



- ✍ يفكر إنه خلاص بعد ما مات كده خُص كل الصعب!
- يتفاجأ بعدها بعذاب القبر وأهواله !!
- ✍ يطلع من القبر ويفكر إن العذاب هيخلص ، يلاقي
- يوم القيامة و ٥٠٠٠٠ سنة حساب وأهوال !!
- ✍ ينتهي الحساب، يُفاجأ بعدها بالنار وعذاب لا يُوصف!

✍ **حياته كلها عذاب x عذاب ، مُنتهى البؤس !!**



- ﴿وعلى العكس تماماً.. كل واحد بيمشي في طريق ربنا؛
- حياته بتبقى (نعيماً صَعداً) .. يعني نعيم ما بيخلصش!
- كل يوم في تصاعد وزيادة.. كل يوم في لذة ومُتعة أكبر..
- ☑ يعني كل خطوة بتتقدّمها لربنا ، مش هقولك بتشبّتك
- وبس؛ بل دي من حلاوتها بتشوّقك للخطوة اللي بعدها..
- ❤ يعني إنت دلوقتي يا حبيب قلبي بتقرأ أو بتسمع كلام
- إيمان وكلام رقيق عن ربنا ﷻ والجنة والنار ويوم القيامة،
- هبيجي لذة في قلبك هتشوّقك إنك تصلي في المسجد.
- ❤ هتنزل تصلي في المسجد ، هتحسّ بلذة أعلى
- وأعلى هتشوّقك إنك تفتح المصحف وتقرأ كلام ربك ﷻ



♥ لما تفتح المصحف؛ هتدوق لذة أعلى وأعلى هتشوّك إنك تتعلم دينك علشان تعرف أكثر عن ربنا ﷻ وتحبه ..
♥ ولما تحب ربنا؛ هتدوق لذة أعلى وأعلى هتشوّك إنك تقوم بالليل تصلي وتناجيه وتفضض له وتبكي بين يديه، وهتبقى ساعتها حاسس إنك طائر في السما من اللذة!

✓ وهو ده طريق الدين يا شباب ؛ نعيم ولذة مُتزايدة

◀◀ وصدق الله تعالى إذ يقول:

﴿وَأَمَّا مَنْ خَافَ مَقَامَ رَبِّهِ وَنَهَى النَّفْسَ عَنِ الْهَوَىٰ

فَإِنَّ الْجَنَّةَ هِيَ الْمَأْوَىٰ﴾

النازعات: ٤٠-٤١

✍ قال الإمام ابن القيم رَحِمَهُ اللهُ فِي تعليقه على هذه الآية:

[فَمَنْ نَهَى نَفْسَهُ عَنِ الْهَوَىٰ ، فَرُوحَهُ تَتَقَلَّبُ فِي جَنَّةِ الْمَأْوَىٰ ،
وَعَيْشُهُ أَطْيَبُ عَيْشٍ ؛ فَالْجَنَّةُ الْكُبْرَى مَأْوَاهُ فِي الْآخِرَةِ ، وَجَنَّةُ
الْمَعْرِفَةِ ، وَالْمَحَبَّةِ ، وَالْأُنْسِ بِاللَّهِ ، وَالشَّوْقِ إِلَى لِقَائِهِ وَالضَّرْحِ
بِهِ ، وَالرِّضَا بِهِ وَعِنَهُ ، مَأْوَى رُوحِهِ فِي الدُّنْيَا .

فَمَنْ كَانَتْ هَذِهِ الْجَنَّةُ مَأْوَاهَا هُنَا ؛ كَانَتْ جَنَّةُ الْخُلْدِ
مَأْوَاهُ يَوْمَ الْمِيعَادِ ، وَمَنْ حُرِمَ هَذِهِ الْجَنَّةُ فِي الدُّنْيَا ، فَهُوَ
أَشَدُّ حَرَمَانًا لِجَنَّةِ الْآخِرَةِ !]

◀ وتأمل روعة البيان القرآني في قوله تعالى :

﴿إِنَّ الْأَبْرَارَ لَفِي نَعِيمٍ * وَإِنَّ الْفُجَّارَ لَفِي جَحِيمٍ﴾

الأنفطار: ١٣-١٤

👈 قال الإمام ابن القيم رَحِمَهُ اللهُ :

[فَلَا تَظُنْ أَنْ قَوْلَهُ تَعَالَى: ﴿إِنَّ الْأَبْرَارَ لَفِي نَعِيمٍ * وَإِنَّ الْفُجَّارَ لَفِي جَحِيمٍ﴾ يَخْتَصُّ بِيَوْمِ الْمَعَادِ فَقَطْ ؛ بل هؤلاء في نعيم في دورهم الثلاثة (الدنيا / القبر / الآخرة)، وهؤلاء في جحيم في دورهم الثلاثة !]

♥ ولذلك قال أحد الصالحين في وصف لذّة القرب من الله:

" لو يعلم الملوك وأبناء الملوك ما نحن فيه
من النعيم والسعادة ؛ لنزعونا عليه "

♥ وقال آخر مُبْدِئاً حُزْنَهُ وتَأْسُفُهُ على الناس اللي
ما حَسْتَشْ بِلَذَّةِ الطاعة وحلاوة الإيمان :

"مساكين أهل الدنيا ،

خرجوا منها ، ولم يذوقوا أطيب ما فيها !

قيل : وما أطيب ما فيها ؟؟؟

قال: مَحَبَّةُ اللهِ ، وَمَعْرِفَتُهُ ، وَذِكْرُهُ "

قال الإمام ابن القيم رَحِمَهُ اللهُ في مدارج السالكين :

[إن سرور القلب مع الله ، وفَرَحُهُ به ، وَفَرَّةُ العين به ، لا يُشْبِهُهُ شيءٌ من نعيم الدنيا إطلاقاً ، وليس له أي نظير يُقَاس به ، بل هو حال من أحوال أهل الجنة !

حتى قال بعض العارفين: " إِنَّهُ لَتَمَرُّ بي أوقات أقول فيها: إن كان أهل الجنة في مثل هذا العيش؛ فهم في عيش طيب! "

ولا ريب أن هذا السرور هو الدافع إلى دوام السير إلى الله ﷻ ، وبذل الجهد في طلبه ، وابتغاء مرضاته .]

✓ يعني الموضوع باختصار زي ما قال شيخ الإسلام رَحِمَهُ اللهُ:

"من أراد السَّعادةَ الأبديةَ ، فَلْيَلْزَمْ عَتَبَةَ الْعُبُودِيَّةِ"

♥ ف لو عايز تعيش السعادة والمتعة الحقيقية بجد ، لازم تعيش معنى العبودية لله؛ إن هدفك في الحياة يكون هو رضا سيدك عنك ، فتستفتي قلبك قبل كل خطوة ، هل الخطوة دي هتقربك منه أو هتبعدك عنه؟؟

فلو كانت هتقربك تعملها ، ولو كانت هتبعدك عن ربك حبيبك ولو شبر واحد ، فماتقربش منها أبداً مهما كانت !

لأنك خلاص تيقنت إن مفيش سعادة في أي طريق غير طريقه ! ومهما كانت الإغراءات والفتن ، فأنت خلاص فهمت آخرتها إيه !

◀ شوف يا حبيب قلبي حديث النبي ﷺ :

(مَنْ تَرَكَ شَيْئاً لِلَّهِ ، عَوَّضَهُ اللَّهُ خَيْرًا مِنْهُ)

يعنى كَلَمْ نفسك واسألها :

هل من المعقول إنك هتسبب مُتعة حرام علشان

ترضي ربك حبيبك ، وربنا ﷻ مش هيعوّضك !!!

مستحييييييل طبعاً !!!

☑ ده إنت هتتعوّض بمتعة أحسن منها مليون مرة ..

◀ **ده ترك الحرام في حد ذاته مُتعة !**

🗣 يعني مثلاً: لما تكون هتتظر نظرة حرام لبنت أو لمشهد وتلاقيك بتجاهد نفسك ، وتقول أنا هجمد المرأة دي ومش هضعف ومش هعصي ربّي ، وتقاوم نفسك وماتعملش المعصية ، بتلاقى قلبك وقتها فرحان ومرتاح ، وتحس بلذة الإيمان ومتعة الانتصار على نفسك وشيطانك ♥ ولسه بقى لما ربنا يعوّضك عن مُجاهدتك وصبرك وتركك للمتعة الحرام دي من أجله .. دي بقى لذة ومتعة وحاجة تانية خالص ، ربنا هيرزق قلبك بها ..

♥ **وكل ده لذة ترك المعصية .. !**

ما بالك بقى بلذة فعل الطاعة ؟؟ !

« وشوفوا كمان حديث النبي ﷺ الذي يقول فيه:

[إِنَّ اللَّهَ لَا يَظْلِمُ مُؤْمِنًا حَسَنَةً؛ يُعْطَى بِهَا فِي الدُّنْيَا، وَيُجْزَى بِهَا فِي الْآخِرَةِ ، وَأَمَّا الْكَافِرُ؛ فَيُطْعَمُ بِحَسَنَاتٍ مَا عَمِلَ لِلَّهِ فِي الدُّنْيَا، حَتَّى إِذَا أَفْضَى إِلَى الْآخِرَةِ، لَمْ يَكُنْ لَهُ حَسَنَةٌ يُجْزَى بِهَا]

وفي رواية أخرى للحديث:

[إِنَّ الْكَافِرَ إِذَا عَمِلَ حَسَنَةً؛ أُطْعِمَ بِهَا طُعْمَةً مِنَ الدُّنْيَا، وَأَمَّا الْمُؤْمِنُ؛ فَإِنَّ اللَّهَ يَدْخُرُ لَهُ حَسَنَاتِهِ فِي الْآخِرَةِ، وَيُعْقِبُهُ رِزْقًا فِي الدُّنْيَا عَلَى طَاعَتِهِ]

🔔 **تعالوا نتوقف مع بعض الفوائد من الحديث العظيم ده**

(إِنَّ اللَّهَ لَا يَظْلِمُ مُؤْمِنًا حَسَنَةً) : يعني ولا حسنة إنت عملتها

هتضيع عليك أبداً ! ، مستحييييل ده يحصل !!

✓ يعني يا حبيب قلبي: ولا تسبيحة سبحتها ، ولا سجدة

سجدتها ، ولا يوم صمته ، ولا آية قرآن قرأتها ، ولا كلمة

نطقتها في الدعوة إلى الله هتضيع عليك !

✓ يعني يا أختي: ولا خصلة شعر غطيتها ، ولا سنتيمتر

من جسمك سترتيه لله هيضع عليكى !

يعني كل عمل عملته لله؛ هتشوف ثوابه يقيناً وحتماً ولابد

(يُعْطَى بِهَا فِي الدُّنْيَا، وَيُجْزَى بِهَا فِي الْآخِرَةِ): يعني كل حسنة تعملها؛

هتاخذ عليها جازيتين: **جائزة في الدنيا، وجائزة في الآخرة**



(يُعْطَى بها في الدنيا): يعني اللي عايز عطاء ربنا ﷻ؛ يمشي في طريقه ، ويقرب منه ، وهو هيزهّل من فيض عطاءاته! اللي عايز يعيش أحلى عيشة؛ يصبر على طريق ربنا ﷻ .

(وَيُعْطِيهِ رِزْقًا في الدنيا على طاعته): يعني اللي عايز رزق من خازين ربنا ﷻ التي لا تنفد؛ يعمل الطاعات ، وهو هيتنزل عليه من كرم الله ﷻ وواسع فضله ورزقه ما لا يتخيله !

(يُعْطَى بها في الدنيا): خُذْ بالك إن النبي ﷺ قال "يُعْطَى" ولم يحدّد نوع العطاء إيه ١٩ ، يعني عطاء مفتوح من كل حاجة! و"يُعْطَى" : فعل مضارع يدل على الاستمرار والتّجدد ، يعني عطاء متواصل الأصل بفضل الله ﷻ .

(وَيُعْطِيهِ رِزْقًا في الدنيا على طاعته): الفعل "يُعْطَى" يُفيد إن الرّزق هيتبع الطاعة مباشرة ، وهيجي بعدها بدون تأخير.

﴿ولو تأملنا؛ هنلاقي إن الحديث ذكر فيه (العطاء) و(الجزاء) في جانب المؤمن ، و(الإطعام) في جانب الكافر! لأن الكفار كالأنعام في الحقيقة ، كما وصفهم الله تعالى: (وَالَّذِينَ كَفَرُوا يَتَمَتَّعُونَ وَيَأْكُلُونَ كَمَا تَأْكُلُ الْأَنْعَامُ وَالنَّارُ مَثْوًى لَّهُمْ)

فلا شيء يهتمهم في الدنيا؛ إلّا ما يملأون به بطونهم !!
أما المؤمن؛ فرزق الله ﷻ له يشمل **الرّزق القلبي** ، من إيمان ولذة طاعة ، وطمأنينة قلب وطيب نفس ، وده **أعلى مراتب الرزق** ، إلى جانب الرّزق المادي في الدنيا .

نفسي ألاقِيها !!

﴿ أحد الشباب هي قول :

إنت بتقول دلوقتى كلام جميل ، وإن سرّ التغيير والثبات موجود فى حلاوة الإيمان ، اللي لو دخلت القلب بجد ، هتقلب كيانه وتخليه حاجة تانية خالص .. والسؤال هو :

إزاي بقى ممكن الواحد يوصل للحلاوة دي ؟؟

﴿ هقول لك: الحاجات اللي هتوصلك لحلاوة الإيمان كتير بفضل الله ﷻ ، وحبينا النبي ﷺ ذكرها ووضحها لنا فى عدة أحاديث ، ولكن لعدم الإطالة ، هنذكر حديث واحد منها ، ونشرحه بشيء من التفصيل ..

﴿ قال رسول الله ﷺ : (**ذاق طعمَ الإيمان؛ مَنْ رَضِيَ**

بالله ربًّا، وبالإسلام دينًا، وبمُحمَّدٍ ﷺ رَسولًا) رواه مسلم

﴿ هتقول : طيب ما أنا مُسلم بالفعل ، وده معناه إني راضى بالله ﷻ وبدين الإسلام وبسيدنا النبي محمد ﷺ ..

ليه بقى مش لاقى طعم الإيمان ؟؟؟ ☹

«هقول لك : **لأن الموضوع مش كلام باللسان وبس!**

الموضوع فهم ، ثم تطبيق عملي في حياتك على أرض الواقع

«**تعالوا نفهم يعني إيه ؟؟؟!**

♥ **(رَضِيتُ بِاللّهِ رَبًّا) :** يعني تتيقّن أن الله هو الخالق الرازق المُدبّر، العليم الخبير ، الملك القدير الذي بيده كل شيء ، وهو الحكيم في كل ما يفعل ، وهو الرحمن الرحيم اللي أرحم بك من أمك وأبيك ، **فترضى بأفعاله وتديره وحكمه وملكه ، وتصريفه لأمر حياتك مهما كانت ، وتعلم علم اليقين إن تقديره هو الخير والأفضل لك ..**

♥ **(رَضِيتُ بِاللّهِ رَبًّا) :** يعني إنك تعترف عملياً إنك العبد وهو الرب ؛ وبالتالي ترضى بأمره الكوني القديري اللي كتبه لك ، وتستسلم لأمره الشرعي وتطيعه ..

♥ **(رَضِيتُ بِاللّهِ رَبًّا) :** يعني أحببت الله واكتفيت به ؛ يعني مش محتاج ولا يفرق معايا أي حد ثاني! إنت يارب غايتي ومطلبي، ورضاك هو هدف حياتي ومنتهى أمنياتي.

فاللي رضي بالله ربّاً: هو اللي آمن بالله ، وسلم نفسه له ، وسلك سبيل مرضاه ، وجرد نفسه من أهوائها ورغباتها ، فعبّد الله ، وأحبه ورجاه ، وخافه واتّقاه ، ورضى بقضائه



♥ (رَضِيتَ بِالْإِسْلَامِ دِينًا) : يعني تَتَيَقَّنُ إِنْ الْإِسْلَامُ هُوَ

الاستسلام والخضوع والانقياد لأمر الله ﷻ ، يعني مش محتاج في كل أمر أو نهي لك من ربنا ﷻ لإقناع ومعرفة الحكمة والغرض من وراءه ... يعني المسألة مش مسألة اقتناع ، وإنما هي مسألة إيمان وامتنال ﴿سَمِعْنَا وَأَطَعْنَا﴾ ..

♥ (رَضِيتَ بِالْإِسْلَامِ دِينًا) : يعني تقبل به شرع ومنهج

صالح لكل زمان ومكان ، وتلتزم به ، وتحفظ حدوده ..

♥ (رَضِيتَ بِالْإِسْلَامِ دِينًا) : يعني إنك مايكونش في

قلبك أي شكوك أو حرج منه ، أو تكون متضايق من أحكامه وأوامره ونواهيه ، حتى لو كانت مخالفة لأهوائك.

فَ الَّذِي رَضِيَ بِالْإِسْلَامِ دِينًا: هُوَ الَّذِي قَبِلَ ضَوَابِطَ الدِّينِ

والتزم بحدوده بصدور رَجَب ، بكل حُب ، وكل تسليم ،

من غير ما يقعد يجادل ويقول ليه ١١؟ ، وإزاي ١١؟

ومش بيقتنع إلا باللي يعجبه ، ويكون على مزاجه !



♥ (رَضِيتَ بِمُحَمَّدٍ ﷺ رَسُولًا) : يعني تَرْضَى إِنْ النَّبِيُّ

ﷺ يكون هو قدوتك وإمامك ، تهتدي بهداه وتمشي على

أثره وتعمل بسُنَّته ، بكل فخر وكل حُب وكل اعتزاز ..

♥ (رضيت بمحمد ﷺ رسولاً) : يعني حبّ النبي ﷺ
جوّه قلبي ، وكلامه نور عيني ، وأمره فوق رأسي ..

♥ (رضيت بمحمد ﷺ رسولاً) : يعني تجتهد إن يكون
شكلك وهيئتك ، وأخلاقك وسلوكك ، وأقوالك وأفعالك
هي هيئة وأخلاق وأفعال حبيبك النبي ﷺ ..

**فاللي رضي بمحمد ﷺ رسولاً: هو اللي عرف قدر وقيمة
النبي ﷺ ، وعرف قد إيه تعب عاشان يوصل لنا الدين !
فمأ قلبه بحبه ، وسعى بجد إنه يعرف سنّته ، واجتهد
إنه يطبقها ؛ عاشان يكون معاه في جنّة الفردوس**

❁ **يا ترى عرفت دلوقتي ليه لسه
مادوقتش طعم وحلاوة الإيمان ؟!**

👈 قال الإمام ابن القيم رَحِمَهُ اللهُ تَعَالَى تعليقاً على هذا الحديث:

[وقد تضمّن هذا الحديث: الرّضا برُبُوبِيّة الله وألوهيّته ،
والرّضا برسوله ﷺ والانقياد له ، والرّضا بدينه والتّسليم
له ، ومن اجتمعت له هذه الثلاثة؛ فهو من الصّديقين حقّاً ،
وهي سهلة بالدّعوى واللسان ، ولكتّها من أصعب الأمور
عند الحقيقة والامتحان ، ولما سيّما إذا جاء ما يُخالف
هوَى النفس ومُرَادها !]



﴿ **هتقول :** طيب فيه سؤال مهم وخطير جداً بيدور في ذهن كتير من الناس ، وهو :

﴿ أنت بتقول دلوقتي إن الواحد مخنوق علشان بعيد عن ربنا ﷻ ، و إن كل حياته سواء عبادة أو عمل ، لازم كلها تكون مُوجَّهة للآخرة مش للدنيا ، وإلا هيحس بالخنقة وهيبقى مش طابق نفسه .. والسؤال هنا :

﴿ **ليه غير المسلمين أو حتى المسلمين اللي بيجاهروا بالمعصية ليل نهار ، أو يا عم ناس أصحابنا عايشين حياتهم بالطول والعرض ، ولما بيصلوا ولما حتى بيعتَبُوا الجامع ، ومع ذلك مش حاسين بضيق قد كده ولما حاجة يعني ، وبنشوفهم على طول مبسوطين وسعداء ؟؟!**

﴿ **هقولك :** أولاً : **عرفت منين إنهم سعداء ؟؟!**

إنت ممكن شايفهم من برّه سُعداء؛ بس والله العظيم هم مش سعداء بالمرّة ! ، بل في قمة الخنقة والتعاسة!

﴿ آه ممكن يكون عندهم قناطير من الفلوس والذهب ، وعندهم قصور وشاليهات وعربيات وأصناف وأنواع كتير من المتع المادية، **بس بالرغم من كل ده؛ مُحَطَّمين نفسياً!**

❖ ولو عايز تتأكد بنفسك ، ابحث على انت وشوف الاحصائيات
لمعدلات القلق والاكتئاب والأمراض النفسية والجريمة والانتحار عند
الناس دي ، هتلاقي أرقام ومعدلات رهيبينيينية !!
 وده لما يدل إنا على الشقاء والتعاسة والعذاب اللي هم فيه!

◀ وعلشان كده؛ ربنا ﷻ أخبرنا عن حالهم ده ، علشان
محدث فينا يتفتن بهم ويفتكر إنهم سعداء ، فقال ﷻ :

﴿ فَلَا تُعْجِبْكَ أَمْوَالُهُمْ وَلَا أَوْلَادُهُمْ

إِنَّمَا يُرِيدُ اللَّهُ لِيُعَذِّبَهُمْ بِهَا فِي الْحَيَاةِ الدُّنْيَا ﴾

التوبة: ٥٥

الآية دي محورية وخطيرة جداً ، ولازم تفهمها كقاعدة في
حياتك علشان تغير نظرتك القاصرة لعطاء الله للناس

❖ قال الإمام ابن عاشور رَحِمَهُ اللهُ فِي تَفْسِيرِهِ :

[وهذا يدل على مذمة حالهم ، وأن كثرة أموالهم لما
 توجب لهم طمأنينة بال ، وإعلام للمسلمين أن ما يرون
 بعض هؤلاء المنافقين فيه من متاع الحياة الدنيا لما
 ينبغي أن يكون محل إعجاب المؤمنين ، وأن يحسبوا
 المنافقين قد نالوا شيئاً من الحظ العاجل؛ لأن الله بين
 أن ذلك سبب في عذابهم في الدنيا وليس سعادتهم!]

﴿ وقال الشيخ السعدى رَحِمَهُ اللهُ :

[تكون أموالهم وأولادهم سبباً لعذابهم ، فهم يتعبون في تحصيلها ، ويخافون من زوالها ، وإن أنفقوها لا يتهنئون بها ؛ بل لا يزالون يعانون الشدائد والمشاق فيها !]

﴿ وقال الشيخ الشعراوي رَحِمَهُ اللهُ :

[وقد أفهمنا الحق سبحانه وتعالى أنه إذا أمدَّ الكافر أو المنافق بالمال والولد؛ فلذلك ليس رفعةً من شأنه ، وإنما ليعذبه بهما في الدنيا والآخرة !]

﴿ وعاشان تتيقن من الكلام ده ، تعالى أحكيك قصة واقعية تأكد لك ، قصة أغنى امرأة في العالم ؛ "كريستينا أوناسيس"

﴿ "كريستينا أوناسيس" بنت أغنى رجل أعمال في العالم ، الملياردير الشهير "أرسطو أوناسيس" ، اللي كان يملك ثروة هائلة من المليارات والطائرات والأساطيل البحرية .. مات أبوها ، فورثت كريستينا كل الثروة دي ، ذهب وأموال وتجارات وشركات .. وعاشت حياة البزخ والترف والرَّفاهية لدرجة إنها كانت بتبعت طائرة مخصوص عاشان تنقل علبة مشروب الصودا الدايت لها في أمريكا !! وفي مرةً بعتت طائرة هيلكوبتر مخصوص من النمسا إلي سويسرا لجلب شريط كاسيت كانت نسيته هناك !!



◀ وذكر "بيتر إيفانز" المؤرخ وكاتب قصة حياة والدها إن كريستينا كانت بتحب جداً ارتداء الألماس والمجوهرات ..

➤ **فهل يا ترى بعد كل ده عاشت سعيدة؟!**

الجواب: إنها تزوجت برجل أمريكي عاش معها شهر ثم طلقها ، ثم تزوجت برجل يوناني عاش معها شهر ثم طلقها أو طلقته ، ثم تزوجت للمرة الثالثة برجل شيوعي! فسألها أحد الصحفيين: لماذا كل هذا؟!، ما هذا التشتت؟!

فقالت : ➤ أبحث عن السعادة !!

وعاش معها الشيوعي ده فترة قصيرة ، ثم طلقها كذلك ، ثم تزوجت للمرة الرابعة برجل فرنسي ، وبعدها حضرت حفل كبير في فرنسا ، وهناك سألها أحد الصحفيين : هل أنت ما زلت أغنى امرأة في العالم ؟!

قالت: نعم أغنى امرأة ، ولكن أشقى وأتعس امرأة !!

وعاش معها هذا الفرنسي مدة ، ثم وجدوها بعد ذلك جثة هامة بإحدى الشاليهات بدولة الأرجنتين ، نتيجة جرعة زائدة من المخدرات ، ولم يكن عمرها يتجاوز ٣٧ سنة !!

عاشت كريستينا حياتها في اكتئاب مُزمن ! ، ولم تستطع كل ثرواتها الهائلة أن تحقق لها أبسط مقومات السعادة !!

❦ ومش كريستينا أوناسيس وبس ، بل لو بحثت هتلاقي
أثرياء ومشاهير من أدباء وممثلين ومغنيين وغيرهم ،
كل الناس كانت شايفاهم سعداء ، ولكن حياتهم كانت
بؤس×بؤس ، و كانوا بيعانوا أشد المعاناة من الاكتئاب !

◀ ومنهم على سبيل المثال: الروائية الإنجليزية الأدبية
فرجينيا وولف اللي ماتت منتحرة !! ، ورئيس وزراء
بريطانيا ونستون تشرشل ، والرئيس الأمريكي أبراهام
لينكولن ، والملحن والموسيقيار الشهير أماديوس موزارت
، والرسام الهولندي فان غوخ ، والمغنية بيونسي جيزيل ،
والكاتب الإنجليزي المعروف تشارلز ديكنز ، والفيلسوف
فريدريك نيتشه ، والممثلة العالمية مارلين مونرو !!

وأكبر وأوضح دليل على الضنك اللي بيعيشه العصاة وأهل
الضلّال في الدنيا هو❦ "شهاداتهم واعترافاتهم بأنفسهم"

❧ ف لو سألت أي واحد أسلم أو تاب ورجع لله عن حياته
قبل كده، هيقول لك إن حياته كانت جحيم بمعنى الكلمة!
كانت سوداء قاتمة! ، حياة كلها تشاؤم وإحباط وغم ويأس!!
هيقول لك إنه كان بيعيش في خنقة وشقاء وضياح وقلق
وحيرة وتوهان ، ولكن دلوقتي أصبح بيشعر بسعادة
وطمأنينة وراحة وتفاؤل وحياة هادئة لا توصف !

🗣️ وكمثال بسيط: المُنغني الأمريكي (تشوسي هوكنز) والمعروف باسم (loon)، الذي كان يحظى بشهرة واسعة جداً في الوسط الشعبي الأمريكي بسبب الغناء، بعدما حقق نجاحاً باهراً، حتى أصبح من أفضل ١٠ مغنين في أمريكا، حسب استفتاءات وسائل الإعلام الأمريكية، حتى أنه تم بيع ٧ ملايين نسخة من أحد ألبوماته !

« يقول "لوون" في حوار صحفي بعد إسلامه :

[أصدقك القول ، أنني ورغم المال والشهرة ؛ إلا أنني لم أكن أجِد السعادة والطمأنينة في داخلي !

كنت أفقد أهم شيء في حياتي، وهو أنني لا أشعر بالسعادة ، وكل هذه الأشياء المادية من حولي لم تحققها لي ! وبقيت أبحث عن طريق السعادة ، فوجدتها في الإسلام ، فأسلمت ، وغيّرت اسمي إلى أمير، وأخيراً وجدت السعادة التي ظلت أبحث عنها ، بعد ١٧ عاماً من الضياع والألم والمعاناة في عالمٍ من الهوس والجنون !]

وبعد إسلامه شعر بالسعادة تغمره ، بل هو يبكي اليوم من شدة السعادة التي هو فيها ، ويقول :

[تغيرت حياتي بالكامل بعد أن تركت الغناء ، وأشعر الآن بالراحة النفسية ، والطمأنينة التي كنت أنشدها منذ سنوات طويلة !]

◆ ثانياً : تعرف تاكل لحمة قرود ؟؟؟؟!

أكيد هتقرف منها ، صح؟؟ .. طيب ليه فيه ناس تانيين
 - في أفريقيا مثلاً - بياكلوها و(بيمزروا) فيها كمان؟؟
 ▶ هل ده لأن لحمة القروود حلوة وطعمة ولذيذة
 وخفيفة على المعدة؟؟

ولما السبب إن (معدتهم فسدت) وباضت من كتر ما اتعودت
 على أكل مثل هذه القذارة، فمابقتش فارقة معاهم خلاص!
 ◀ بل إن الناس دي لو جيت مثلاً تأكلهم لحمة كويسة
 -بقر مثلاً- هيقولوا إنها مش طعمة زي لحمة القروود !!

✍ زي ما الإمام ابن القيم رَحِمَهُ اللهُ يقول :

[وكل من عرف الله؛ أحبه وأخلص العبادة له ولأبد ، ولم
 يؤثر على الله شيئاً من المحبوبات أبداً .. فمن أثر عليه
 شيئاً من المحبوبات؛ فقلبه مريض ، كما أن المعدة إذا
 اعتادت أكل الخبيث وآثرته على الطيب ؛ سقطت عنها
 شهوة الحلال الطيب ، وتعوضت بمحبة غيره.]

✍ وقال الإمام الحافظ ابن رجب رَحِمَهُ اللهُ :

[وكما أن الجسد لما يجد حلاوة الطعام والشراب إلا عند
 صحته ، فإذا مرض؛ لم يجد حلاوة ما ينفعه من ذلك ،



بل قد يستحلي ما يضره ، وما ليس فيه حلاوة ؛ وذلك
لغلبة المرض عليه !

فكذلك القلب ، إنما يجد حلاوة الإيمان إذا سلم من مرض
 الأهواء المضلة والشهوات المحرمة ، ومتى مرض وسقم؛
لم يجد حلاوة الإيمان ، بل يستحلي ما فيه هلاكه من
الأهواء والمعاصي !

ومن هنا قال ﷺ : (لا يزني الزاني حين يزني وهو مؤمن)
 ، لأنه لو كمل إيمانه؛ لوجد حلاوة الإيمان ، فاستغنى
 بها عن حلاوة المعصية !]

﴿ **هتقول:** بس فيه ناس كتير بتشتكي إنها بتقرب من
 ربنا ﷻ ، ولكن برده مش حاسين بأي طعم للعبادة .. !
 يعني تلاقي الشاب يقول : الواحد مش بيلقي لذة في
 العبادة ، ولا انشراح في الصدر ، ولا الحاجات اللي بنسمع
 عنها دي كلها ! ، بل بالعكس؛ الواحد بيلقي الصلاة صعبة
 ، والقرآن صعب ، والعبادة ثقيلة على النفس !

◀ تفسر بآيه الكلام ده ؟؟ !

« **هقول لك:** أصل للأسف المشكلة الكبيرة في "**القلب**"

القلب من كثر المعاصي؛ بقى عليه **طبقة صدأ رهيبه !**
 وبالتالي؛ الإيمان مش هيعرف يلامس قلبك من أول مرة !



« فالموضوع هياخذ وقت في الأول على ما طبقة الصدا
دي تزول ، واحدة واحدة ، ومرة ورا مرة ، قلبك هيلقط
وهتبدأ تحسّ فعلاً بلذّة الطاعة والعبادة ، فما تستعجلش



▶ شاب هيقول :

بس المسألة بالنسبة لي مش مسألة وقت، لأنّي بقالي فترة
كبيرة بحاول أوصل للذّة الطاعة ، وبرده مش عارف !!
بصلي وأصوم وأقرأ قرآن ، ومش لاقى أي حلاوة في قلبي!!

﴿ هقول لك : للأسف فيه حاجات كثير ممكن تكون هي
السبب في المشكلة دي ، منها :

↪ أننا بنؤدي العبادة بسرعة ، وبنكروتها في الإنجاز ،
تأدية واجب بدون تركيز ، وإسقاط للفرض وخلص !
↪ أننا بنعملها بطريقة مش صحيحة ، مش على مُراد
الله ﷻ منّا ، ولما زي ما النبي ﷺ عملها !

↪ أننا بنروح نعملها وإحنا مغصوبين ومتكدرين ، ومش
حاسين إنها مصدر للنور والفرحة والراحة في القلب !
مش حاسين بقيمتها وقدرتها على إسعادنا وإصلاح حياتنا!

↪ أنْ نظرناها لها قَمّة السطحية، ومش عايزين نتعلم
أصولها وأسرارها، ولما عايزين نتعمّق في معانيها ونفهمها!
فبتبقى عبادة جوفاء بدون أي جوهر أو مضمون روحي!



❖ أن فيه ذنوب بنبقى مُصْرِّين عليها ومش عايزين نتوب منها ، بتقف كحائل ، وتمنع القلب من الإحساس !

❖ أن فيه أمراض مستخبية في القلب ، وإحنا مش واخدين بالناس منها ، زي مرض النفاق ، الرياء ، الشبهات ، الكبر ، الحسد ، الغل إلخ ، فقد يكون أحد الأمراض دي مانعاً لنا من التلذذ بحلاوة الإيمان !

❖ أننا مش بندعي ربنا ونسأله بصدق وتضرع وإلحاح ويقين إنه يرزقنا لذة الطاعة العبادية !

❖ قال شيخ الإسلام رحمته الله : **إِذَا لَمْ تَجِدْ لِلْقَمَلِ حَلَاوَةً فِي**

قَلْبِكَ وَانْشِرَاحًا فَأَتَاهُمُ، فَإِنَّ الرَّبَّ -تَعَالَى- شَكُورٌ.

يَغْنِي أَنَّهُ لَا بُدَّ أَنْ يُثَبِّبَ الْعَامِلَ عَلَى عَمَلِهِ فِي الدُّنْيَا مِنْ حَلَاوَةٍ

يَجِدُهَا فِي قَلْبِهِ، وَقُوَّةَ انْشِرَاحٍ وَقُرَّةَ عَيْنٍ [

❖ **والخلاصة: إن فيه خلل موجود؛ سواء في العمل نفسه ،**

أو في مصدر الإحساس اللي هو القلب ! ، وإنت طبيب نفسك ،

وعليك إنك تكتشف فين الخلل ده ، وتصلحه !

❖ وياريت لو تقرأ كتاب "رمضان آخر روقان" ، هيفيدك بإذن الله في كيفية الوصول عملياً للاستمتاع بلذة العبادية .

❖ **واوعى يا حبيب قلبي الشيطان يدخل لك من المدخل**

ده ويخليك تسبب العبادات ، ويقول لك إنها ملهاش لازمة

طالما مفيهاش خشوع والقلب مش حاسس لها أي طعم!



✕ **إوعى تسمع لكلامه واستمر في عبادتك** ، لأن هي التي هتقربك من ربك ، وهتكون سبب في حبه لك ورضاه عنك؛ وبالتالي هيفتح عليك ويرزقك اللذة بفضله وكرمه. ده غير إن استمرارك في العبادة هو اللي هيصالح قلبك ، وينقيّه من رواسب المعاصي ، ويؤهله للإحساس باللذة ..

✍ قال الإمام ابن القيم رَحِمَهُ اللهُ فِي مدارج السالكين :

[**السَّالِكُ فِي أَوَّلِ الْأَمْرِ يَجِدُ تَعَبَ التَّكَالِيفِ وَمَشَقَّةَ الْعَمَلِ لِعَدَمِ أَنْسِ قَلْبِهِ بِمَعْبُودِهِ** ، فإذا حصل للقلب رُوحُ الْأُنْسِ؛ زَالَتْ عَنْهُ تِلْكَ التَّكَالِيفُ وَالْمَشَاقُ ، فَصَارَتْ قُرَّةُ عَيْنٍ لَهُ وَلَذَّةٌ ، فَتَصِيرُ الصَّلَاةُ قُرَّةَ عَيْنِهِ بَعْدَ أَنْ كَانَتْ عَمَلًا شَاقًّا عَلَيْهِ ، وَيَسْتَرِيحُ بِهَا بَعْدَ أَنْ كَانَ يَطْلُبُ الرَّاحَةَ مِنْهَا ..]

﴿ **وعايز أوكد لك ، إن القرب من الله لا يحقق سعادة ولا متعة ببساطة كما قد يتوهم البعض، بل كل شيء وله ثمن!** ﴾

فأولاً: لازم تحسن الظن بالله ﷻ ، وتثق إنه هيوصلك إليه ويقربك منه ولو بعد حين ، ثم تخوض حرباً ضد نفسك ، لتجعل أحكام الله فوق كل شيء تهواه نفسك ، ثم تستمر حتى بعد سقوطك ، وتقف من جديد مهما تعثرت . في البداية؛ هتلاقي الطريق شاق ومجهد ، بل يؤلم القلب وشهواته ، ولكن سرعان ما يهدأ ألمه على مدار الطريق ، ثم ستبدأ تشعر بمتعة الطريق ، ثم تكبر هذه المتعة حتى تشعر بشغف وحبٍ للسير فيه حتى آخر لحظة في حياتك

بتفكر في إيه؟؟!!

❖ لو فاجأتك دلوقتي وسألتك :

ياترى سرحان وبالك مشغول وبتفكر في إيه يا عم الحاج؟؟

▶ هتقول : وانت مالك .. دي حاجة ملكش دعوة بها ..!

❖ هقول لك : إزاي بس ١٩٩ ده تفكيرك هيكون إما سبب

فرحك وسعادتك ، أو سبب شقاءك وتعاستك ..

◀ شوف يا حبيب قلبي حديث النبي ﷺ اللي بيقول فيه :

(من كانت الآخرة همّه ؛ جَلَّ اللهُ غِنَاهُ في قلبه ، وجمَعَ له شَمْلَه ،

وأنته الدنيا وهي راغمة ، ومن كانت الدنيا همّه ؛ جَلَّ اللهُ فَقْرَه بين

عينيه ، وفرَّقَ عليه شَمْلَه ، ولم يَأْتِه من الدنيا إلا ما كُتِبَ له) صحيح

❖ تعالى نحاول نفهم الحديث ، ورمز معايا في الكلام

◈ (من كانت الآخرة همّه) : همّه يعني اهتمامه .. يعني

يبقى أكثر حاجة شاغلة باله وتفكيره هي أمور الآخرة .. يعني

تركيزه وعينه على الآخرة قبل ما ياخذ أي خطوة في حياته ..

يعني أولوياته في الحياة هي الحاجات اللي ممكن تؤثر على

آخِرته .. يعني حتى وهو مشغول بأمور الدنيا المباحة؛ فهو

محتسب ونيتة فيها الآخرة!

❖ **يا ترى يا حبيب قلبي إيه هو " الهَمّ الأكبر "**

اللي مسيطر على تفكيرك وشاغل بالك في حياتك ؟؟

❖ **يا ترى أكبر همك هو** هم الدراسة والكورسات ؟؟
الرزق والفلوس ؟؟ ، الوظيفة والترقية ؟؟ ، الأكل واللبس
والخروجات ؟؟ ، مشاكل عيالك ؟؟ ، عربيتك ؟؟ ، موبايك ؟؟
الفيس والواتس ؟؟ ، أخبار فريق الكورة اللي بتشجعه ؟؟

❖ **ولّا أكبر همك هو** هم الوصول إلى الله ؟؟ ، الخشوع
في الصلاة ؟؟ ، تنقية قلبك من الخصومات ؟؟ ، قضاء
حوائج المسلمين ؟؟ ، برّ الوالدين ؟؟ ، تعلّم التجويد ؟؟ ،
تدبر وفهم القرآن ؟؟ ، النجاة من أهوال يوم القيامة ؟؟
المصير إلى الجنة أو النار ؟؟ ، رفقة النبي ﷺ في الجنة ؟؟

❖ **لو عايز تعرف بجد إيه هو الهَمّ الأكبر اللي شاغلك ؟**

◀ نامل كويس جداً في أحوالك ، وشوف :

إيه غايتك وهدفك في الحياة ؟؟ يعني إنت عايش ليه ؟؟
إيه اللي بتفكر فيه قبل ما تنام ؟ وكذلك أول ما تصحى ؟
إيه الحاجات اللي بتفرحك ؟ وإيه الحاجات اللي بتزعجك ؟
إيه اللي بتسرح فيه كل شوية ؟ وإيه بتحلم به في منامك ؟
إيه هي الحاجات اللي بتؤثر تأثير مباشر في قراراتك ،
كاختيار الزوجة مثلاً ، هل هو الجمال فقط ؟ ولا الدين ؟؟

هات ورقة ، واقعد لوحده مع نفسك ٥ دقائق بس ،
وحاول تكتب اللي بتفكر فيه ، شوف إيه أكثر حاجة شاغلاك
وشوف إنت من اللي همهم الدنيا؟ ، ولأ اللي همهم الآخرة؟

لو كان همّك الأكبر هو الآخرة ؛

هتكافأب ((٣ من رَّبَّانية)) غاية في الروعة والجمال

① (جعل الله غناه في قلبه) : يعني قلبه مطمئن ..
يعني راضي ومرتاح وقانع بكل اللي ربنا قسمه له ، وهو ده
الغنى الحقيقي ، غنى القلب والنفس ، كما أخبر النبي ﷺ :
(وارْضَ بما قَسَمَ الله لك ، تَكُنْ أغنى الناس)

② (وجمع له شمله) : جَمَعَ الشمل هو الاجتماع بكل ما
يحيط بالإنسان .. يعني ربنا ﷻ يجمع عليه قلبه وفكره
ومقصده فيعرف طريقه في الحياة بسهولة ويسر ، ويجمع
عليه أهله ويزيد في الحب والمودة ما بينهم .. ويجمع
عليه أولاده ويهديهم له .. ويجمع عليه أقاربه ويبعد عنه
القطيعة ، ويجمع عليه ماله فتكسب تجارتَه وربنا يبارك
له فيها ، ويجمع القلوب عليه فيكتب له القبول في الأرض
وكل اللي يشوفه يحبه ، ويجمع عليه أمور الخير كلها ..



③ **(وأنته الدنيا وهي راغمة) :** يعني يهرب من الدنيا، ومع ذلك تجيله لحد رجليه ، وهي ذليلة حقيرة بدون أي تعب أو مجهود! ، وهو أصلاً مش محتاجها ولا فارقة معاه ، بس ربنا ﷻ بفضل وكرمه يعطيه خيرها كله .. فيجيله الرزق من حيث لا يحتسب ، وربنا يجعله في كل أموره التوفيق والتيسير والعون ..

يعني الدنيا مش هتضيع منه؛ بالعكس ، هتجيله ومن غير ما يتعب ويجرى وراها ، إلى جانب ثواب ورضا ربنا عنه ..

﴿ وعلى العكس تماماً .. ﴾

« اللي هيكون أكبر همّه ﴿ الدنيا ﴾ ، اللي هيكون أغلب تفكيره فيها ، ومعظم عمله لها ، وفرحه وحزنه عليها ، وأولوياته وقراراته علشانها ، اللي إرادته هتكون هي الدنيا؛

ربنا ﷻ هيعاقبه بـ ((٣ عقوبات)) :

① **(جعل الله فقره بين عينيه) :** يعني مهما كانت ثروته وفلوسه بالملايين والمليارات ، فهو في كل لحظة مش شايف قدامه غير النقص ! ، ومهما كان غناه فهو خايف من الفقر ، دائماً خايف من خسارة تجارته أو ضياع ثروته! على طول قلقان من المستقبل واللي ممكن يحصل فيه !

② (وَسَّتَ عَلَيْهِ شَمْلُهُ) : يعني شقيانا وتعباااان !!
 نايه في الدنيا ويَجْرى في كل إتجاهه.. ربنا ﷻ يَفْرق عليه
 تفكيره فتلاقيه مشتت البال ، على طول متوتر وشايل هم كل
 أمر مهما كان تافه ، ويفرق عليه ماله فمايلاقيش أي بركة في
 أمواله ، ويفرق عليه أولاده فيشوف العقوق والعذاب منهم ،
 ويفرق عليه زوجته فيلاقيها مش عاجبها أي شيء وعلى طول
 البيت في نكد يخليه يكره حياته كلها! ويفرق الناس عنه
 فمايلاقيش حد يحبه غير أهل الضلال والعصيان ، وده لأن ربنا
 ﷻ كتب له البغضاء في الأرض !

③ (ولم يأتِه من الدنيا إلا ما كتب له) : يعني ليل نهار
بيجري ورا الدنيا ، وهي يتهرب منه ومش عارف يحصلها،
ويشتغل بكل جهده وقوّته ويهلك نفسه علشانها ،
وبرده مش بياخد في الآخر غير اللي ربنا ﷻ كتبه له !
فمهما عمل؛ لا هيعجل الرزق، ولا هياخد أكثر من قسمته!



« وفي نفس المعنى، قال النبي ﷺ : (من جعل الهموم همّاً واحداً، همّ آخرته، كفاه الله همّ دنياه، ومن تشعبت به الهموم في أحوال الدنيا، لَمْ يُبَالِ الله في أي أوديتها هلك) حسن صحيح

- تَشَعَّبَتْ به الهموم: يعني شاليل همّ ٥٠٠ حاجة فوق دماغه!
 - لَمْ يُبَالِ الله في أي أوديتها هلك: يعني ربنا ﷻ هيتركه لهمومه ، فهيكون آخرته الهلاك بسبب أي همّ منها !

❦ قال الإمام ابن القيم رَحِمَهُ اللهُ :

[إذا أصبح العبد وأمسى وليس همّه إلا الله وحده ،
 تَحَمَّلَ الله سبحانه حوائجه كلها ، وحَمَلَ عنه كل ما أهُمَّهُ ،
 وفَرَّغَ قلبه لمحَبَّتِهِ ، ولسانه لذكْرِهِ ، وجَوَارِحَهُ لطاعته .
 وإن أصبح العبد وأمسى والدنيا همّه ، حَمَلَهُ الله هُمومها
 وغُمومها وأنكادها، ووَكَّلَهُ إلى نفسه، فشغل جوارحه بخدمة
 الخلق، فهو يكدح كدح الوحوش في خدمة غيره!]

الزمر: ٣٦

❦ قَالَ تَعَالَى: ﴿ أَلَيْسَ اللَّهُ بِكَافٍ عَبْدَهُ ﴾ ❦

الآية كأنها بتطبطب على قلبك وتحسبك بأمان واطمئنان
 وراحة ملهاش مثيل، وتقوّلُك: شاليل همّ ليه وانت مع ربنا؟
 بقى ربنا مايقدرش إنه يكفيك ويحل كل مشاكل حياتك؟!
ده ربك ﷻ قادر إنه يُبدِّل كل همومك وأحزانك أفراح وسرور

مرتاج كده؟؟!!

◀◀ يا شباب .. كثير منّا جرب مراراً كثيرة المعصية ، مش عايزين نتجرع مرار أكثر من كده! ، بجد كفاية غباء! الانسان العاقل هو اللي هيفهم إن لذّة المعصية عاملة زي طعام لذيذ جداً جداً ، **لكنه مسموووووم** !!!!!
فهل ممكن حد عاقل يأكل منه حتى لو كانت لذّته ملهاش مثيل ، وهو عارف ومتأكد إن بعدها التعب والهلاك !!!

تفنى اللذائذ ممن نال شهوتها ❖❖ من الحرام ويبقى الذلّ والعارُ تبقى عواقب سوءٍ في نهايتها ❖❖ لا خير في لذّة من بعدها النارُ

ومن أروع ما قال الإمام ابن القيم رَحِمَهُ اللهُ :

[يا بائعاً سعادته الكبرى بالعذاب الأليم ، إنّما هي لذّة فانية ، وشهوة منقضية ، تذهب لذّاتها وتبقى آثارها ، فرح ساعة لا شهراً ، وغمّ سنة ؛ بل دهر ! ، **طعام لذيذ مسموم** ، أوله لذّة ، وآخره هلاك ، وندم حين لا تنفع الندامة !]

❖ **يا حبيب قلبي ..** إوعى الشيطان يضحك عليك ويغريك بشهوة فيلم قدر آخرتها لحظات ، وبعدها تجني الخنقة والضيق!
يا أختي الغالية .. إوعى الشيطان يزين ليكي الكلام مع شاب علشان لذّة حبّ حرام ، ويغرك بمتعة لحظات هتعيشيها ، ويعمي عينيك عن نهاية المشهد المعروفة اللي كلها حسرة وألم وندم!

﴿ **يا حبيب قلبي .. الطاعة ربنا ﷻ سَمَّاها (حَسَنَة) ..**

(حَسَنَة) يعني هي اللي هتَحَسِّن شكل وطعم حياتك ..

(حَسَنَة) يعني حاجة جميلة أوي .. جميلة في ذاتها ،

وجميلة في عمايلها ، وجميلة في نتائجها ..

﴿ **يا أختي الغالية .. المعصية ربنا ﷻ سماها (سَيِّئَة) ..**

(سَيِّئَة) يعني قبيحة في ذاتها ، وفي عمايلها ، وفي نتائجها !

﴿ ومحدث ينسى أبداً قول الله تبارك وتعالى :

﴿أَمْ حَسِبَ الَّذِينَ اجْتَرَحُوا السَّيِّئَاتِ أَنْ نَجْعَلَهُمْ كَالَّذِينَ آمَنُوا

وَعَمِلُوا الصَّالِحَاتِ سَوَاءً مَحْيَاهُمْ وَمَمَاتُهُمْ سَاءَ مَا يَحْكُمُونَ﴾

﴿ (اجْتَرَحُوا السَّيِّئَاتِ) : يعني السيئات واقعياً ما هي إلا

جراح مؤلمة في قلبك .. كل جرح كفيل إنه يسبب لك ألم

وعذاب لا يُطاق ، وينكد عليك حياتك كلها !!

﴿ الآية دي تُسمَّى "مَبَكَاةُ الْعَابِدِينَ" ، أبكتهم بُكَاءً مَرِيئاً ،

لأنهم تيقنوا إن ربنا الحكم العدل **مستحيل هيساوي في الحياة**

أوبعد الموت بين اللي أطاعه وصبر علشان يرضيه ، واللي

عصاه واتبع شهواته .. حاشا لله ﷻ ؛ **بل حياة الطائع جنة**

ونعيم ، **وحياة العاصي عذاب وجحيم** .. وأي حد هيقول أو

يعتقد غير كده؛ ربنا ﷻ قال عنهم: (سَاءَ مَا يَحْكُمُونَ) !



❖ **يا حبيب قلبي ..** لو بعدت عن ربنا؛ هتلاقي الدنيا كلها ظلام حواليك ، هتلاقي الدنيا كلها مقفلة في وشك ، هتتحول نفسك إلى "سجن مرعب" محدش يطيقه !!

يا أختي الغالية .. روحك دي زي الوردة الجميلة الرقيقة ، لو بعدتي عن ربنا؛ "هتدبل وتفقد جمالها" لحد ما تموت !!

❖ **والله عمرك ما هتعيش سعيد وإنّت مابتصليش!!**

❖ **عمرك ما هتعيش سعيد وإنّت هاجر للقرآن !!**

❖ **عمرك ما هتعيش سعيد مع أغاني وكليبات ورقص !!**

❖ **عمرك ما هتعيشي سعيدة بالنمّص وحجاب الموضة !!**

❖ **عمرك ما هتعيشي سعيدة بعلاقة حبّ حرام !!**

► أقسم بالله العظيم كل الحاجات دي وأي حاجة حرام غيرها؛ مش هتلاقوا فيها غير الهمّ والخنقة والضنك ..

❖ **كل ده علشان إيه يعني؟؟، بقى مش عارفين نجاهد شهواتنا**

ونستعين بالله ، ونصبر اليومين اللي عايشينهم فى الدنيا؟؟

⊗ **فلا راحة في ذنب سيؤلمك في الدنيا
ويُعزّضك للعذاب في الآخرة !**

✓ **والعاقل لا يكتب على نفسه الشقاء والعذاب ،**

وهو بمقدوره أن يتناول من السعادة ما لذّ وطاب !

﴿ يا شباب .. ﴾

♥ ربنا ﷻ هو ﴿نُورُ السَّمَاوَاتِ وَالْأَرْضِ﴾ ..

كل ما هتقرب منه؛ هتقرب من النور اللي هيملأ حياتك كلها، ويخليها دائماً مشرقة بنور الأمل اللي هيساعدك إنك تكمل في أي طريق ..

♥ الله ﷻ هو ﴿الكَرِيمُ﴾ ..

كل ما هتقرب منه؛ هتلاقى الخير والفتح والتوفيق والبركة ملازمالك في كل حياتك ..

♥ الله ﷻ هو ﴿الْكَبِيرُ﴾ ..

كل ما هتقرب منه؛ هتلاقى كل همومك بقت أصغر وأتفه ما يكون ..

♥ الله ﷻ هو ﴿الْقَوِيَّ﴾ ..

كل ما هتقرب منه؛ هتلاقى أقوى في مواجهة أي مشكلة في الحياة ..

♥ الله ﷻ هو ﴿المؤمن﴾ ..

كل ما هتقرب منه؛ هتجسّ بالأمان واطمئنان القلب
وراحة البال..

♥ الله ﷻ هو ﴿السلام﴾ ..

كل ما هتقرب منه؛ هتعيش السّلامة النفسية
والسّكينة والصّفاء الداخلي..

♥ الله ﷻ هو ﴿الجَمِيل﴾ ..

كل ما هتقرب منه؛ هتشوف كل شيء في الحياة أجمل
وأروع ما يكون..



أحلى حياة في طاعة الله Fb/